

# Leeter ngada Hebøre hay Mey da ray Leeter ngada Hebøre hay

Leeter ngada Hebøre hay na, ndaw ma sèra mezøley nga ndaw ma wuzlala daa ba. Hebøre hay na, ara ndøhay Jøwif hay. Ndaw ma wuzlala leeter e keɗe a wuɗey nga vøltar gøɗan nga Jøwif hay masa ma tømara mey nga Yesu. A vøltar gøɗan nga tøbey mey nga Yesu ma føna ma føna kwa ata daa banay.

Ndaw ma wuzlala leeter e na, a wuzda Yesu na, a fønta maslan nga Gazlavay, a fønta ndøhay ma tøla mey nga Gazlavay zleezle, asaya, a føna Mawiz, maja anga na, Bøzey nga Gazlavay (fasølawal 1 haa 3). Asaya, a wuzda anga na, ndaw mahura da ray ndøhay ma ka kwakwas nga Gazlavay masa fara fara. A da njey ndaw ma ka kwakwas nga sørmataw. Anga ta vølda ray anga la dey pal nga møcey maja mebørey nga ndøhay tabiya. Anda keɗe, Yesu ta handawa Mejøwey-mey Mawiya la aa slam a nga Mejøwey-mey Magurma masa Gazlavay ma jøwa ta ndøhay anga hay ta fa Mawiz.

Ndøhay ma tømme mey nga Yesu na, ata daa cøved mawiya dømme. A gwamara nga søpey cøved magurma saba. Maaya na, a sørfadamata ndøhay masa zleezle ma pamara Gazlavay nga ndaw ata fara fara, ata masa ma høtam gøɗan

daa cøved anga. (Nøka fasølawal 11.) Mey madagway-dakw daa leeter e na, ara mey da ray menjey nga ndøhay ma tøba mey nga Yesu. Si a njam maaya maaya daa mecømey-ray nga Yesu.

Daa leeter e keðe na, mey mekele mekele daha nga vøley gøðan a ndøhay:

Mey nga Gazlavay aa ta gøðan nga key sløra daa ndaw (4.12)

Mey da ray mejøwey-mey mawiya (8.8-13)

Mey da ray ndøhay zleezle ma pamara Gazlavay nga ndaw ata fara fara (11.1-12.13)

Nøkakwa dey na, si fa Yesu gway (12.2)

*Mey da ray Yesu, ndaw ma wuzdørwa mewedey nga Gazlavay*

<sup>1</sup> Zleezle na, \*Gazlavay taa guzltar la ngada papan nga papa aløkwa hay dey ga ta cøved hay mekele mekele ta mey ndøhay ma tøla mey anga hay weewe. <sup>2</sup> Ama wure keðe daa masa bøla gweegwe a ndøvey keðe na, taa guzlnakwar la ta mey Bøzey anga. Gazlavay a løma bøla ta slam da vad cøpa na, ta fa Bøzey anga ha, asaya, Gazlavay ta wala la nga wey da ray cek hay tabiya. <sup>3</sup> Ma wuzdørwa mewedey nga Gazlavay na, ara anga. Bøzey a na, a lawa Gazlavay kørad! Mey anga na, aa ta gøðan. Ara ta mey anga ha aa ma kørza bøla ta slam da vad. Masa anga ma ðiytara cøved cay \* a ndøhay amba a njam

---

**1:2** 1.2 Bøzey anga: 3.6; 5.8; a løma bøla ta slam da vad: Jan 1.2; Kwa 1.16; Heb 11.3 \* **1:3** 1.3 ma ðiytara cøved cay: A wudøy nga løyey Yesu a ðiytara cøved nga ndøhay na, ta fa memøcey anga fa hwadam mazlanjalakaya.

manjar mebørey fa mey nga Gazlavay na, ta', a tøpey a vad, a njeý ta har-zømay nga Bay Gazlavay ma wey da ray cek hay tabiya.

*Yesu a fønta maslan hay nga Gazlavay tabiya*

<sup>4</sup> Bøzey a na, a fønta maslan hay nga Gazlavay. Mezøley masa Gazlavay ma vøldara na, a føna nga maslan hay a may. <sup>5</sup> Sørmara, Gazlavay ta løvar kwa ngada maslan anga pal:

«Kah na, Bøzey aðaw,  
døga tasana yah Papakw»  
na, daa ba sølak. Asaya, taa guzley da ray maslan anga pal, a løvey:

«Yah na, Papaha,  
anga na, Bøzey aðaw,»  
na, daa ba may.

<sup>6</sup> Ama masa anga fa da slørdørwa Bøzey anga maa-mey-ndaw † a bøla na, taa guzley la, a løvey: «Akwar, maslan aðaw hay tabiya, ragadamar!»

<sup>7</sup> Da ray maslan anga hay na, aa guzley, a løvey: «Maslan aðaw hay na, ara ndøhay ma ka sløra aðaw hay.

Ata anda memed, asaya, ata anda neneh nga awaw.»

<sup>8</sup> Ama ngada Bøzey anga na, taa guzlar la, a løvey:

---

**1:3** 1.3 2Kwr 4.4; Kwa 1.15; har-zømay: 8.1 **1:4** 1.4 Ef 1.21; Føl 2.9 **1:5** 1.5 Ps 2.7; 2Sam 7.14; Mt 3.17; SNM 13.33; Heb 5.5 † **1:6** 1.6 Bøzey anga maa-mey-ndaw: A wufey nga løvey Gazlavay anga ta bøzey hay mekele mekele na, køne ba, ama a wufey nga løvey Yesu fa wey da ray cek hay tabiya nga Gazlavay anda bøzey maa-mey-ndaw ma wey da ray cek nga papaha. Nøka 2.11-13; Kwa 1.15, 18, lej Rm 8.29. **1:6** 1.6 Ps 89.28; 97.7 **1:7** 1.7 Ps 104.4

«Kah na, Bay Gazlavay, ka da zōma bay akah ŋga sərmataw.

Ka da wey da ray ndəhay akah hay ta cəved e.

<sup>9</sup> Ka wudəy na, mekey cek ta cəved e, ba na, mekey cek ta zlabay ba.

Maja ŋgene, ya ta walaka la, yah, Gazlavay akah.

Ya taa səmdaka la,

asaya, ya ta vəlka gədan la

ma fəna ŋga ndəhay mekele masa akwar bama.»

<sup>10</sup> Gazlavay aa guzley da ray Bəzey aŋga saya, a ləvey:

«Bay Mahura, ara kah ma ləma bəla dəga daa mezley a.

Ara kah ma ləma slam da vad ta har akah.

<sup>11</sup> Cek hay a cəpa a ndəvam la, ama kah na, ka da njeý ŋga sərmataw.

Ahaw, cek hay a tabiya a da nəsam anda zana magurma.

<sup>12</sup> Ka da takwamata

anda ndaw ma tekwemey zana magurma.

Cek hay a cəpa, ka da mbəddata

anda ndaw ma mbədey zana manəskaya.

Ama kah na, ka da njeý kəne, ka fa da mbədey daa ba,

kah daha ŋga sərmataw.»

<sup>13</sup> Gazlavay aa guzlar ŋgada Bəzey aŋga, a ləvar:

«Sawa njeý ta har-zəmay adaw

amba ya wakwa da ray ndəhay

haa ta pas masa yah ma pata masa-gəra akah hay cay

asi salay akah.»

Ama taa guzley anda ngene kwa ngada maslan anga pal na, daa ba sɔlak.

<sup>14</sup> Kaa maslan hay nga Gazlavay na, wa hay wa? Maslan hay nga Gazlavay na, ara mesɔfney hay ma ka slɔra nga Gazlavay gway. Gazlavay fa slɔrdata nga jɔney ndɔhay masa ma da lɔham.

## 2

### *Ya da rɔskwa mey nga Gazlavay ba*

<sup>1</sup> Gazlavay taa guzlɔndakwar la ta mey Bɔzey anga. Anda keɔe, si ya wakwa vaw ma fɔna ma fɔna fa mey masa alɔkwa ma cɔndakwa ha, da daa ba na, ya zlanɔadɔkwa la aa cɔved mekele. <sup>2</sup> Mey masa maslan hay nga Gazlavay ma kadamara zleezle na, ta wuzwa la ara mey fara fara. Ndɔhay masa ma rɔsmara mey a, ma tɔbmara ba na, Gazlavay ta sɔrdata banay la tɔɔe fa mebɔrey ata ha. <sup>3</sup> Ama alɔkwa na, alɔkwa ta cɔndakwa mey da ray melɔhey la ma fɔna mey masa maslan hay nga Gazlavay ma kadamara ha. Anda keɔe, da alɔkwa fa rɔskwa mey a, ya tɔbkwa ba na, ngene, ya da lɔhkwa na, kwara? Ara Bay Mahura ta ray anga ma wuzda mey da ray melɔhey a teesɔɔ. Fa dɔba ha, ndɔhay masa ma cɔndamara mey a na, ta wuzdamandakwara la ara mey fara fara.

<sup>4</sup> Gazlavay may, ta wuzda la ara mey fara fara ta fa gɔdan anga len ta fa maazla hay mekele mekele masa anga ma kata. Asaya, Gazlavay ta

vøltar gøðan̄ nga Mesøfn̄ey an̄ga la a ndøhay  
nga key sløra mekele mekele anda aa ma wudfey.

*Yesu a mæcey na, maja wa hay wa?*

<sup>5</sup> Yaa guzlam na, da ray menjey nga ndøhay da  
bøla mawiya ngada fa mey. Daa menjey a na,  
Gazlavay fa da vøltar cøved̄ ngada maslan̄ an̄ga  
hay nga wam da ray ndøhay daa ba. <sup>6</sup> Sasøkar  
jak, mawuzlalakaya daa ðerewel nga Gazlavay,  
a løvey:

«Ndaw-magøðan̄ na, wa may wa  
amba kah, Bay Gazlavay, ka wulkey da ray a  
na!

Ndaw-magøðan̄ na, wa may wa  
amba ka nøkfar dey na!

<sup>7</sup> Ka ta tərda la nga mecøhe da ray maslan̄ akah  
hay  
nga menjey nekødfey,  
fa døba ha, ka ta hølma la, ka ta høslar ray la  
anda bay.

<sup>8</sup> Ka ta vøldata cek hay sem cøpa asi har an̄ga \*.»  
Yaw, Gazlavay ta vøldata cek hay sem cøpa asi  
har nga ndaw-magøðan̄, kwa cek pal masa an̄ga  
ma wey da ray a ba na, daa ba. Ta ngene he cøpa  
wure keðe, aløkwa fa høtkwa ndaw-magøðan̄ fa  
wey da ray cek hay tabiya na, daa ba. <sup>9</sup> Ama ya  
sørkwa \*Yesu na, ta tørey la nga mecøhe da ray  
maslan̄ hay nga Gazlavay nga menjey nekødfey,

---

**2:4** 2.4 Jan̄ 2.11; SNM 2.22; 1Kwr 12.4-11; 2Kwr 12.12    **2:6** 2.6-8  
Ps 8.5-7    \* **2:8** 2.8 asi har an̄ga: Ta mey Gørek na, a løvey: «asi  
salay an̄ga».    **2:8** 2.8 1Kwr 15.27

amba a mөcey maja ndөhay tabiya maja dey-ceceh nga Gazlavay. Ahaw, ya sөrkwa Yesu na, Gazlavay fa hөлma, fa hөslar ray ga. A ka көne na, maja aa ma sөrey banay daa memөcey.

<sup>10</sup> Ara Gazlavay ma kata cek hay tabiya. Cek hay a tabiya a njam na, maja anga. Anda keđe, ta mbafar la a Gazlavay amba a tөrda Yesu nga ndaw ma gwa nga kata cek hay tabiya maaya maaya ta fa banay masa aa ma sөra. Gazlavay a ka anda keđe na, amba ndөhay ga a tөram nga bөz anga hay, a mbөzdata aa slam anga mewedey, maja ara Yesu ma da handata nga lөhey.

<sup>11</sup> Yesu fa tөrdata ndөhay nga ndөhay maaya manjar mebөrey fa mey nga Gazlavay. Ndөhay maaya ha na, Papa ata letek ta Yesu a. Ara maja ngenе, Yesu ma zөлta «mөлma adaw hay». Kwa hwaray a kar nga zөлta көne ba. <sup>12</sup> Yesu a lөvar a Gazlavay:

«Ya daa guzltar a mөлma adaw hay  
da ray cek masa kah ma ka.

Ya da hөлmaka fa mey nga ndөhay akah hay  
tabiya.»

<sup>13</sup> Aa guzley saya, a lөvey:

«Yah na, ya da pa Gazlavay  
nga ndaw adaw mandaw mandaw.»

A lөvey saya:

«Yah keđe, yah ta ndөhay adaw hay  
masa Gazlavay ma vөldatiwa.»

<sup>14</sup> Ndøhay anğa hay a na, ata ndøhay magødan. Ara maja nğene, Yesu ma tørey nğa ndaw-magødan anda ata may. A ka køne na, amba ta fa memøcey anğa aa zøfda \*Satan, bay-malula, ma handørwa memøcey a bøla.

<sup>15</sup> Ndøhay da bøla keđe na, ata anda beke hay daa menjey ata tabiya maja fa zluram ta memøcey. Ara maja nğene, Yesu a møcey na, amba a pøskatørwa ndøhay daa beke he, a zluram ta memøcey saba. <sup>16</sup> Yaw, Yesu a sawa

a bøla na, nğa jøney maslan hay nğa Gazlavay ba, ama a sawa nğa jøney ndøhay daa søkway nğa \*Abøraham. <sup>17</sup> Ara maja nğene, si a

tørey nğa ndaw-magødan anda mølmaha hay daa cek hay tabiya. A ka køne na, amba a tørey nğa \*ndaw mahura da ray ndøhay ma ka kwakwas nğa Gazlavay, ndaw masa ma sørey dey-ceceh fa ndaw, ma ka sløra nğa Gazlavay ta cøved e. Sløra anğa na, ara nğa vøley ray anğa nğa møcey amba a mbøkdatara mebørey nğa ndøhay. <sup>18</sup> Fara fara, daa masa Yesu fa

sørey banay na, Satan ta jada la nğa bata. Anda keđe, Yesu a gwa nğa jønta ndøhay masa Satan fa jadata nğa betey.

### 3

#### *Yesu a føna Mawiz*

<sup>1</sup> Møлма adaw hay daa \*mecømey-ray nğa ndøhay nğa Yesu, Gazlavay ta zølkwar la nğa

---

**2:14** 2.14 2.17; Jan 1.14; bay-malula: Jan 8.44; 12.31; 1Jn 3.8; CWJ 12.10 **2:15** 2.15 Rm 8.21 **2:16** 2.16 Iz 41.8-9 **2:17** 2.17 4.14; 5.2; Føl 2.7; 1Jn 2.2 **2:18** 2.18 4.15; Mt 4.1-11

tørey ndøhay anğa hay. Anda keđe, wulkam da ray Yesu, ndaw masa Gazlavay ma slørdørwa nğa key ndaw mahura da ray ndøhay ma ka kwakwas anğa. Ara ta fa anğa aløkwa ma tøbkwā mey nğa Gazlavay, aløkwa fa wuzdakwa mey a fa mey nğa ndøhay tabiya. <sup>2</sup> Ara Gazlavay ma pa nğa ka sløra ha. A ka sløra ha na, ta cøved e anda \*Mawiz ma ka sløra anğa ta cøved e nğada ndøhay nğa Gazlavay tabiya zleezle may. <sup>3</sup> Yesu na, si ndøhay aa hømdamara ma føna Mawiz. Ara køne may, ndaw ma løma way na, aa hømdamara a føna way a. <sup>4</sup> Ka sørmara, kwa way wura wura na, ndaw ma løma daha. Ama ma katørwa cek hay tabiya na, ara Gazlavay. <sup>5</sup> Mawiz na, ara ndaw ma ka sløra ta cøved e da wuzlah ndøhay nğa Gazlavay tabiya. Ara anğa ma wuzdatara mey masa Gazlavay ma daa guzlda nğada fa mey. <sup>6</sup> Ama ma wey da ray ndøhay nğa Gazlavay tabiya ta cøved e na, ara \*Køriste, Bøzey nğa Gazlavay. Da aløkwa fa jarakwa maaya maaya daa mey nğa Gazlavay masa aløkwa ma tøbkwā, asaya, da aløkwa fa søkwakwa cek masa Gazlavay ma da vøldandakwara ta meesømey na, ngene, aløkwa ndøhay anğa hay.

*Mey da ray meməskey-vaw nğa ndøhay nğa Gazlavay*

<sup>7</sup> Maja ngene, \*Mesøfney nğa Gazlavay a løvey:

---

**3:1** 3.1 4.14    **3:2** 3.2 Mesl 12.7    **3:6** 3.6 Bøzey nğa Gazlavay: 5.8; aløkwa fa søkwakwa cek: 3.14; 4.14; 6.18-19; 9.28; 10.22-24, 35; 13.14; Kwa 1.23; Føl 3.20; 2Tm 4.8

«Da akwar fa cændamara d'fay nga Gazlavay  
tasana na,

<sup>8</sup> ka da dèzlmata sləmay akwar hay ba.

Ka da kamara anda papan̄ nga papakw akwar  
hay zleezle

ma kam həma a ray Gazlavay ba.

Daa ṅgene, ata da wuzlah-ley, ta jadamara  
Gazlavay la.»

<sup>9</sup> Gazlavay aa guzley, a ləvey:

«Da wuzlah-ley a, ta hətmatar cek hay maaya  
tabiya

masa yah ma kata daa mevey kwakwar  
məfad la.

Ama ta ṅgene he cəpa, ta jadamaya la cəṅga.

<sup>10</sup> Ara maja ṅgene, yah ma cey mevel a ray ata.

Ta', yaa guzley, ya ləvey: "Mewulkey ata, an̄ga  
maaya ba,

cek masa yah ma wudfey amba a kamara na,  
ta sərmara daa ba."

<sup>11</sup> Daa masa yah ma cey mevel heyey na,

ya ta mbedfey la, ya ləvey:

"Kwa fa da mbəzam aa slam masa yah ma  
diytara

ṅnga məskey vaw na, daa ba səlak."»

<sup>12</sup> Məlma adaw hay, wam vaw! Ndəhay masa  
ta mevel maaya ba, ma təba mey nga Gazlavay

ba na, kwa ndaw pal da wuzlah akwar a da tərey  
anda ata ba, maja mevel maaya ba anda ṅgene

na, a da zlan̄gadadakwar ta Gazlavay, ndaw  
masa an̄ga daha ta dey nga sərmataw. <sup>13</sup> Ama

maaya na, ka dəkam mevel da wuzlah akwar

mandaw mandaw, amba \*Satan a batakwar nga key mebørey ba, kwa ndaw pal da wuzlah akwar fa da dözla slømay daa ba. Ahaw, døkam mevel da wuzlah akwar, maja tasana keðe, Gazlavay a wudey ngaa guzIndakwar saya. <sup>14</sup> Mey nga Gazlavay masa aløkwa ma tøkwa døga nga mezley a haa mendøvey a na, da aløkwa fa jarakwa maaya maaya daa mey a na, ñgene, aløkwa ndøhay nga \*Køriste.

<sup>15</sup> Mawuzlalakaya daa ðerewel nga Gazlavay, a løvey:

«Da akwar fa cøndamara ðay nga Gazlavay tasana na,  
ka da dözlmata slømay akwar hay ba.

Ka da kamara anda papan nga papakw akwar hay zleezle  
ma kam høma a ray Gazlavay ba.»

<sup>16</sup> Ma cøndamara ðay nga Gazlavay ta ma kam høma a ray a na, wa hay wa? Ara ndøhay tabiya masa \*Mawiz ma badatøwa daa hwayak nga \*Ejip. <sup>17</sup> Gazlavay a cey mevel mevey kwakwar møfad na, da ray wa hay wa? A cey mevel na, da ray ndøhay a ma kam mebørey. Anda keðe, ata cøpa ta møcam sem da wuzlah-ley. <sup>18</sup> Gazlavay ta mbedey la, a løvey: «Kwa fa da mbøzam aa slam masa yah ma ðiytara nga møskey vaw na, daa ba sølak.» A mbedey køne na, maja wa hay wa? A mbedey na, maja ndøhay a ma cønmar mey ba. <sup>19</sup> Fara fara, ya søkwa ta høtam nga

mbözey aa slam meməskey-vaw a daa ba, maja ata ma təbmara mey nga Gazlavay daa ba.

## 4

<sup>1</sup> Zleezle na, Gazlavay taa guzley la amba ya mbəzkwa aa slam masa anğa ma diyndakwara nga məskey vaw. Mey a na, aa daha cənga. Anda keđe, wakwa vaw, anja ndaw pal da wuzlah akwar nga mbəkey fa dəba ba. <sup>2</sup> Ta wuzdamandakwara mey maaya nga Gazlavay la anda ata ma wuzdamatara a papaŋ nga papa aləkwa hay zleezle may. Ama ata na, mey a ta jənta daa ba, maja ata ma təbmara mey a ta mevel pal daa ba. Anda keđe, ta hətam nga mbözey aa slam meməskey-vaw masa Gazlavay ma diytara daa ba. <sup>3</sup> Ama aləkwa na, ya ta təkwa mey a la. Anda keđe, ya hətkwa nga mbözey aa slam meməskey-vaw a la. Gazlavay taa guzley la da ray ndəhay masa ma təbmara mey a ba, a ləvey:

«Daa masa yah ma cey mevel heyey na,  
ya ta mbedey la, ya ləvey:

“Kwa fa da mbəzam aa slam masa yah ma diytara

nga məskey vaw na, daa ba səlak.”»

Ama Gazlavay na, ta ndəvda sləra anğa sem dəga nga mezley nga bəla, ba diya? <sup>4</sup> Ya sərkwə na, maja mawuzlalakaya da ray \*pas meməskey-vaw daa dərewel nga Gazlavay, a ləvey: «Gazlavay ta kata sləra anğa hay la tabiya dər maakwaw, nga dər maasala ha na, a məskey vaw.» <sup>5</sup> Anda mawuzlalakaya heyey

saya, a lövey: «Kwa fa da mbözam aa slam masa yah ma dñytara nga mäskey vaw na, daa ba sölak.» <sup>6</sup> Ndøhay ma cøndamara mey maaya nga Gazlavay teesedñ na, ta hõtam nga mbözey aa slam masa Gazlavay ma dñytara ha na, daa ba, maja ata ma cønmar mey ba. Anda kede, ndøhay mekele a hõtam nga mbözey la aa slam memäskey-vaw a cønnga. <sup>7</sup> Maja ñgene, Gazlavay ta pey ðar mekele la, a zøla ðar a «tasana». Fa døba ha mevey ga, taa guzley la da ray ðar a ta mey \*Davít. Mey a na, ara mey makadakaya heyey ma lövey:

«Da akwar fa cøndamara ðay nga Gazlavay tasana na,

ka da dözlmata slømay akwar hay ba.»

<sup>8</sup> Da fara fara Jesøwe ta handata papan ñga papa aløkwa hay la aa slam memäskey-vaw masa Gazlavay ma dñytara na, anja ñgene, Gazlavay fa daa guzley da ray ðar memäskey-vaw mekele fa døba ha na, daa saba. <sup>9</sup> Anda kede, ya sèrkwa, ñgada ndøhay ñga Gazlavay na, memäskey-vaw daha. Memäskey-vaw a na, ara anda Gazlavay ma mäskey vaw ñga ðar maasala ha. <sup>10</sup> Yaw, kwa waawa ma mbözey aa slam memäskey-vaw ñga Gazlavay a na, a da mäskey vaw fa døba ñga sløra anga anda Gazlavay ma mäskey vaw fa døba ñga sløra anga may. <sup>11</sup> Maja ñgene, kakwa gøðan amba ya høtkwa membözey aa slam memäskey-vaw masa Gazlavay ma ðiya ha. Wakwa vaw amba kwa ndaw pal da wuzlah aløkwa a key høma a

---

**4:5** 4.5 3.11    **4:7** 4.7 3.7-8; 3.15    **4:8** 4.8 Mew 31.7; Jes 22.4

**4:10** 4.10 4.4

ray Gazlavay anda papan̄ nga papa aləkwa hay ba. Da daa ba na, ndaw aha a daa zədfey.

<sup>12</sup> Mey nga Gazlavay na, aa ta gədan̄, fa key sləra daa ndaw, a zəmey a fəna dələw masa mey a cew. Mey a na, a mbəzey kasl aa mevel nga ndaw anda dələw ma wunka mezəvey hay nga tetesl ma mbəzey kasl aa sasərab. A wuzdərwa mewulkey daa mevel nga ndaw, asaya, a wuzdərwa cek masa ndaw ma wufey nga ka. <sup>13</sup> Cek maḃakaya fa dey nga Gazlavay na, daa ba. Cek hay tabiya masa an̄ga ma kata na, fa hətam fa dey an̄ga maaya maaya. Cek hay tabiya masa aləkwa ma kakwa na, ya wuzdakwa la fa mey an̄ga.

*Yesu an̄ga ndaw mahura da ray ndəhay ma ka kwakwas nga Gazlavay*

<sup>14</sup> Ndaw aləkwa mahura da ray ndəhay ma ka kwakwas nga Gazlavay masa ma təpey a cakay Gazlavay a vad̄ na, daha. Ara Yesu, Bəzey nga Gazlavay. Maja n̄gene, jarkwa maaya maaya daa mey nga Gazlavay masa aləkwa ma təḃkwa ta masa aləkwa ma wuzdakwa fa mey nga ndəhay tabiya. <sup>15</sup> Ndaw aləkwa mahura da ray ndəhay ma ka kwakwas nga Gazlavay a ta sərɤandakwar dey-ceceh la daa banay aləkwa maja aləkwa ndəhay masa-bəle hay. An̄ga na, ta sərəy banay la anda aləkwa, ta jadamara la nga betey dey weewe ta fa cek hay mekele mekele

---

**4:12** 4.12 Iz 49.2; 55.11; Jer 17.10; Jan̄ 12.48; Ef 6.17; 1Pi 1.23; CWJ 1.16 **4:14** 4.14 5.8; 8.1; ndaw mahura da ray ndəhay ma ka kwakwas nga Gazlavay: 2.17-18; 3.1; 5.1, 4-6; 7.24-28; 8.3; 9.7, 11

nga key mebørey, ama kwa ta key mebørey daa ba. <sup>16</sup> Anda keɗe, ngəchakwa ngada fa Bay Gazlavay, ndaw masa ma wudta ndəhay kalah. Ngəchakwa ta mandərzay daa dey daa ba amba a sərfandakwar dey-ceceh, a kandakwar maaya, a jəndakwar ta pas masa aləkwa daa banay.

## 5

<sup>1</sup> Kwa \*ndaw mahura da ray ndəhay ma ka kwakwas nga Gazlavay wura wura, a walamara na, da wuzlah ndəhay. Sləra anɗa na, ara mekey kwakwas nga Gazlavay maja ndəhay. A vələr cek a Gazlavay, asaya, a hərəar gənaw ngada Gazlavay, amba Gazlavay a mbəkdatara mebørey nga ndəhay. <sup>2</sup> \*Ndaw mahura da ray ndəhay ma ka kwakwas nga Gazlavay na, anɗa ray anɗa, anɗa ndaw-magədan anda ndəhay mekele may. Anda keɗe, a gwa nga jəkfatar sləmay fa ndəhay ma sərmara cek ba ta ndəhay masa fa zlangadam la daa cəved masa maaya. <sup>3</sup> Maja anɗa ndaw-magədan na, a hərəy gənaw nga vələy ngada Gazlavay maja mebørey nga ndəhay daada ba, ama maja mebørey anɗa may.

<sup>4</sup> Ndaw a gwa a pa ray anɗa nga ndaw mahura da ray ndəhay ma ka kwakwas nga Gazlavay ta ray anɗa ba. Si Gazlavay ma pa anda aa ma pa \*Aranw. <sup>5</sup> \*Kəriste may ta pa ray anɗa nga ndaw mahura da ray ndəhay ma ka kwakwas

---

**4:15** 4.15 2.18; 5.2; 7.26; 9.12; 1Jn 3.5    **4:16** 4.16 10.19    **5:1**  
 5.1 4.14    **5:2** 5.2 2.17-18; 4.15; 7.28    **5:3** 5.3 7.27; 9.7; Lev 9.7;  
 16.6, 15    **5:4** 5.4 Aranw: Mab 28.1

nga Gazlavay ta ray an̄ga na, daa ba. Ama ara Gazlavay ma pa, aa guzlar, a ləvar:

«Kah na, Bəzey aɖaw,  
dəga tasana yah Papakw.»

<sup>6</sup> Daa slam langar, mawuzlalakaya saya, Gazlavay a ləvar:

«Ka da n̄jey ndaw ma ka kwakwas aɖaw nga sərmataw  
anda Melkisedek.»

<sup>7</sup> Daa masa Yesu Kəriste an̄ga da bəla na, a səra Gazlavay aa ta gədan̄ nga ləhda daa meməcey. Anda kede, ta dərar dan̄gay la ta mewudey, ta matəway daa dey a Gazlavay. Gazlavay ta jəkfar sləmay la, ta sləkɖadərwa la daa meməcey, maja aa ma nar ray. <sup>8</sup> Kwa an̄ga Bəzey nga Gazlavay na, taa sərkey nga ney ray la ta fa banay masa aa ma səra. <sup>9</sup> Masa Gazlavay ma tərda nga ndaw ma gwa nga kata cek hay tabiya maaya maaya cay na, ndəhay ma namar ray tabiya a hətam meləhey la ta fa vəɖa nga sərmataw. <sup>10</sup> Yesu a gwa a ləhdata, maja Gazlavay ma pa nga ndaw mahura da ray ndəhay ma ka kwakwas an̄ga anda Melkisedek.

### *Ka da mbəkdamara mey nga Gazlavay ba*

<sup>11</sup> Mey hay ga daha ngaa guzley ngada akwar da ray \*Kəriste, ndaw aləkwa mahura da ray ndəhay ma ka kwakwas nga Gazlavay. Ama an̄ga ta banay amba ya wuzdakwara mey da ray a maaya maaya, maja akwar fa da cəndamara

---

**5:5** 5.5 1.5    **5:6** 5.6 Ps 110.4; Heb 6.20    **5:7** 5.7 Mt 26.36-46  
**5:8** 5.8 1.2; 4.14; 6.4-6; 7.3, 28; 10.29; Jan̄ 1.34; menyey ray: 4.15;  
Fəl 2.8    **5:9** 5.9 7.27    **5:10** 5.10 5.6; 6.20

fiyaw fiyaw daa ba. <sup>12</sup> Pas a ta wuswa cay tæde amba kaa sarkadamata ndohay. Ama haa wure kefe, si ndohay aa sarkadamakwar da ray mey hay nga Gazlavay masa ngeeme masa akwar ma cendamara cay cenga. Akwar na, anda bæza hay ma sam dowa ma wusmara nga zomey daf ba aran. <sup>13</sup> Kwa waawa ma sey dowa daada na, nga bæzey mecøhe dagay. Cek masa maaya ta maaya ba na, a gwa nga wunkata ba. <sup>14</sup> Ndohay mahura hay a zomam na, daf. Ata na, makotatakaya, a gwamara nga wunkey cek masa maaya ta maaya ba.

## 6

<sup>1</sup> Maja ngene, nakwa fa mey fa mey, sasarkakwa cek masa nga ndohay mahura hay. Ya da njakwa daa meesørkey nga ndohay masa ma sarmara mey nga Køriste tølám ba. Aløkwa taa sarkakwa cek hay masa ngeeme daa metøbey mey nga Yesu Køriste cay. Anda meløvey, aløkwa taa sarkakwa cay da ray membøkey mekey cek ma hendey ndaw aa memøcey, asaya, da ray mepey Gazlavay nga ndaw fara fara. <sup>2</sup> Aløkwa taa sarkakwa cay da ray \*baptem mekele mekele, da ray mepey har a ray ndohay \*, da ray masløkðawa nga ndohay daa memøcey, len da ray sariya masa

---

**5:12** 5.12-13 1Kwr 3.2    **5:14** 5.14 13.9; Rm 16.19; 1Kwr 14.20; Ef 4.14    **6:1** 6.1 9.14    \* **6:2** 6.2 mepey har a ray ndohay: Ara cek mekey nga wuzda ndaw aha mapakaya wal ngada Gazlavay amba Mesøfney nga Gazlavay a sawa a ray a, kwa daa baptem, kwa daa sløra wura wura ngada Gazlavay. Nøka SNM 13.2-3; 1Tm 4.14.

Gazlavay ma da d̄esla ma da njeɣ ɳga s̄ermataw.

<sup>3</sup> Ahaw, nakwa fa mey fa mey! Da Gazlavay ta t̄ɔba la na, ya daa s̄erkakwa mees̄erkey ɳga nd̄ohay mahura hay d̄ɔba.

<sup>4</sup> Nd̄ohay masa ma mb̄ɔd̄mar d̄ɔba sem a Gazlavay na, a gwamara a v̄ɔhmawa ɳgaa c̄ɔfd̄ey ambahw fa Gazlavay saya na, kwara? Ta njam la dey pal daa mewed̄ey ɳga Gazlavay. Cek da vad̄ masa Gazlavay ma v̄ɔdatara ɳgada nd̄ohay aɳga hay na, taa c̄ɔkdamara la. \*Mes̄ɔfney ɳga Gazlavay ta sawa la a ray ata may. <sup>5</sup> Ta s̄ɔmra la mey ɳga Gazlavay na, ara mey maaya fara fara. Asaya, ta s̄ɔmra maazla hay ma da kam ɳgada fa mey la. <sup>6</sup> Ama, ta ɳgene he c̄ɔpa, ta mb̄ɔd̄mar d̄ɔba sem a Gazlavay c̄ɔɳga. Nd̄ohay a, a gwamara ɳga v̄ɔhmawa ɳgaa c̄ɔfd̄ey ambahw fa Gazlavay saba, maja da ndaw ta mb̄ɔd̄ar d̄ɔba sem a Gazlavay na, a key ɳgene, anda a d̄ɔra B̄ɔzey ɳga Gazlavay fa hwadam mazlan̄galakaya saya. Asaya, a key ɳgene, anda a c̄ɔd̄a fa mey ɳga nd̄ohay.

<sup>7</sup> Wulkakwa da ray ley cey! Ley masa var fa pey da hwad̄ a maaya maaya na, cek daa ley a, a key maaya maaya ɳgada ndaw ɳga ley a. Anda kede, a wuzwa maaya ɳga Gazlavay aa da ray ley a. <sup>8</sup> Ama da ley a, guzer ta hatak ta t̄ɔba sem na, ɳgene ara ley maaya ba. Ley a fa da njeɣ ga daa ba, Gazlavay a da n̄ɔsa, a da mb̄ɔkda aa kusaf, fa d̄ɔba ha, awaw a daa wura k̄ɔmed̄ek!

---

**6:2** 6.2 Jan 3.25-26; SNM 19.1-6    **6:4** 6.4-6 2.1-3; 5.8; 10.26-29; 12.25; Mt 12.31; 1Jɳ 5.16    **6:8** 6.8 Mt 13.7, 22

<sup>9</sup> Jam adaw hay, kwa da yaa guzlmakwar anda keƙe na, ya sɛrmara fara fara, akwar daa cɛved maaya masa ma da lɛhdakwar. <sup>10</sup> Gazlavay na, ara ndaw ma key cek ta cɛved e, aa fa sɛrfada slɛra maaya masa akwar ma kamara. Asaya, aa fa sɛrfada akwar fa wudmara. Akwar fa wuzdamɛrwa mewudey-vaw akwar a ta fa slɛra masa akwar ma kamara zleezle ngada ndɛhay mekele daa \*mecɛmey-ray nga ndɛhay nga Yesu. Kwa wure keƙe, akwar fa kamara kɛne. <sup>11</sup> Ya wudam na, kwa waawa da wuzlah akwar a key gɛdan nga njey kɛne haa mendɔvey a, ka da gɛram ba, amba ka hɛtam cek hay tabiya masa akwar ma sɛkwmar. <sup>12</sup> Ka da tɛram ndɛhay masa-mayad hay ba, ama njam anda ndɛhay ma tɛba mey nga Gazlavay masa majaratakaya. Ata na, a hɛtam cek masa Gazlavay ma lɔvey a da vɛldatara a ndɛhay anga hay heyey la. Kam cek anda ata.

*Mey da ray Gazlavay ma da katar maaya ngada ndɛhay anga hay*

<sup>13</sup> Masa Gazlavay ma lɔvar a \*Abɛraham a da kar maaya heyey na, ta mbedey la fara fara, a ka cek aha la. Ndaw ma fɛna Gazlavay na, daa ba. Anda keƙe, ta mbedey la ta mezɔley anga. <sup>14</sup> A lɔvey:

«Fara fara, ya da pɛska mey,  
ya da vɛlka bɛza hay ga ara mey ba.»

<sup>15</sup> Masa Abɛraham ma cɛnda mey a la na, ta', a sɛkwa ta dɛk-vaw. Anda keƙe, Abɛraham

ta hōtey cek masa Gazlavay ma lōvar a da kara heyey la. <sup>16</sup> Da ndōhay fa mbađam na, a mbađam ta mezōley ŋga ndōhay masa mahura da ray ata hay. \*Membedey na, a dōsla mey da wuzlah ndōhay. <sup>17</sup> Maja ŋgene, Gazlavay a mbedey amba ndōhay masa aa ma lōvey a da katar maaya heyey na, a sōmara fara fara, a katara la, a mbōđda mewulkey anga ba. Anda keđe, a mbedey, a lōvtar a da katar cek maaya. <sup>18</sup> Mey ma lōvey Gazlavay a da katar maaya ŋgada ndōhay anga hay, leŋ membedey anga na, ara mey hay cew masa a mbōđam ba, maja Gazlavay na, a mbōrzley ba sōlak. Alōkwa masa ta ŋgōchakwa sem ŋgada fa Gazlavay keđe na, mey hay a keđe fa vōlndakwar gōđan ga amba ya sōkwakwa cek masa Gazlavay ma lōvey a da vōldandakwara heyey. <sup>19</sup> Cek masa alōkwa ma sōkwakwa ha na, fa jarandakwar maaya maaya amba ya njakwa majaratakaya fa mey ŋga Gazlavay. Maja ŋgene, \*Slam masa Gazlavay aa da hwađ a na, zana ma gōrca slam aha a wurey la, anda keđe, ya mbōzkwa la a hwađ a, a cakay Gazlavay. <sup>20</sup> Yesu ta mbōzey sem aa slam aha ŋgene teesēđ da ray alōkwa. A mbōzey na, maja alōkwa, maja anga ta tōrey sem ŋga \*ndaw mahura da ray ndōhay ma ka kwakwas ŋga Gazlavay ŋga sōmataw anda Melkisedek.

---

**6:16** 6.16 Mab 22.10; Mt 5.34; 23.16-22      **6:18** 6.18 Mesl 23.19

**6:19** 6.19 3.6; Rm 5.5; Heb 9.3      **6:20** 6.20 4.14; Melkisedek: Ps 110.4; Heb 5.6, 10; 7.1-4

## 7

*Mey da ray Melkisedek*

<sup>1</sup> Melkisedek na, ara bay daa berney nga Salem, asaya, annga \*ndaw ma ka kwakwas nga Gazlavay, Gazlavay Mawaca-waca. Daa ngene na, \*Abøraham ta fəntərwa bay hay la ta gədan daa vøram. Masa annga fa vøhwa na, ta', Melkisedek a daw, a cadərwa ray, a pəsar mey. <sup>2</sup> Abøraham a wunka cek masa annga ma təbtərwa daa vøram a, slam kuraw, a la slam pal, a vøldara a Melkisedek e. Mezøley annga Melkisedek na, a wudfey nga løyey «bay ma key cek ta cøved e.» Asaya, Melkisedek e annga «bay ma wudfey zazay da wuzlah ndøhay,» maja annga bay nga Salem. Salem na, a wudfey nga løyey «zazay». <sup>3</sup> Annga na, dferewel nga Gazlavay faa guzley da ray papaha ta mamaha, lej da ray səkway annga hay na, daa ba. Asaya, faa guzley da ray mayawa annga ta memøcey annga daa ba. Annga na, anda Yesu, Bøzey nga Gazlavay, annga ndaw ma ka kwakwas nga Gazlavay nga sərmataw.

<sup>4</sup> Nøkmara cey! Melkisedek na, annga ndaw mahura, ba daw? Maja kwa Abøraham zleezle, Papan nga papa aləkwa hay na, ta wunka cek hay masa annga ma təbtərwa daa vøram la slam kuraw, ta vøldara slam pal sem. <sup>5</sup> Kwakwas nga \*Mawiz a vøley cøved a ndøhay daa səkway nga \*Levi masa ma ka kwakwas, nga tøbey cek pal daa kuraw nga cek hay tabiya da har ndøhay \*Israyel hay. Kwa Israyel hay a, ara

məlma ata hay daa səkway nga Abərahām. Ta ŋgene he cəpa, fa təbam cek da har ata cənga.

<sup>6</sup> Melkisedek na, aŋga daa \*səkway nga Levi ba, ama ta ŋgene he cəpa, ta təbey cek pal daa kuraw la da har Abərahām. Abərahām masa Gazlavay ma ləvar a da kar maaya heyey na, ara aŋga ma pəsar mey ŋgada Melkisedek ba, ama ara Melkisedek ma pəsar mey a Abərahām.

<sup>7</sup> Ka sərmara, ndaw ma pəsey mey a ndaw na, aa mahura da ray ndaw aha. Anda keđe, Melkisedek na, aa mahura da ray Abərahām.

<sup>8</sup> Ndəhay ma ka kwakwas daa səkway nga Levi ma təbam cek pal daa kuraw na, ata ndəhay masa ma da məcam gway. Ama Melkisedek masa ma təba cek pal daa kuraw da har Abərahām heyey na, aa ta dey nga sərmataw, anda dərewel nga Gazlavay ma ləvey. <sup>9</sup> Ya gwakwa ya ləvkwa ndəhay daa səkway nga Levi masa ma təbam cek pal daa kuraw da har ndəhay mekele na, ta vəlmar la a Melkisedek may, maja papaŋ nga papa ata Abərahām ma vəlmar la. <sup>10</sup> Anda meləvey, masa Abərahām ma vəlmar cek a Melkisedek e na, ta yawa bəzey daa ba araŋ. Ama kwa ta yawa bəzey daa ba araŋ na, Abərahām a vəlmar cek a Melkisedek e. Ara anda ata cewete ta Levi, bəzey ma da yawa daa səkway aŋga may. Anda keđe, a wudəy nga ləvey Melkisedek na, a fənta ndəhay daa səkway nga Levi.

*Mey da ray Yesu, ndaw ma ka kwakwas anda Melkisedek*

<sup>11</sup> Daa \*mewey nga \*Israyel hay na, ndəhay ma ka kwakwas nga Gazlavay na, si ndəhay daa səkway nga \*Levi gway. Sləra nga ndəhay a ŋgene na, ara anda \*Aranw, papaŋ nga papa ata hay zleezle, ma ka. Sləra ha na, a gwa nga ndəvda cek masa Gazlavay ma wudəy nga ka ba. Da a gwa nga ndəvda na, anja Gazlavay fa da pey ndaw ma ka kwakwas mekele masa anda Melkisedek na, daa saba. <sup>12</sup> Da Gazlavay ta mbədda ndaw ma ka kwakwas anga sem na, ŋgene, si mewey nga Israyel hay a mbədey may. <sup>13</sup> Bay aləkwa Mahura Yesu masa aləkwa maa guzlkwa da ray a kede na, səkway anga wal ta \*səkway nga Levi. Kwa ndaw daa səkway anga pal masa anga \*ndaw ma ka kwakwas nga Gazlavay na, daa ba. <sup>14</sup> Ya sərkwə fara fara Yesu na, a yawa daa səkway nga Juda. Daa masa \*Mawiz maa guzley da ray ndəhay ma ka kwakwas na, kwa taa guzley da ray səkway a daa ba.

<sup>15</sup> Ndəhay ma ka kwakwas nga Gazlavay masa daa səkway nga Levi na, a gwamara nga handamata ndəhay fa Gazlavay ba. Mey a kede, fa wuzwa maaya maaya maja Gazlavay ta pey ndaw mekele la nga ndaw ma ka kwakwas anga anda Melkisedek. <sup>16</sup> Ndaw a, a tərey ndaw ma ka kwakwas nga Gazlavay na, ta fa mewey nga ndaw-magədan ba, ama ta fa gədan nga heter mendəvey ba, <sup>17</sup> maja mawuzlalakaya daa dərəwel nga Gazlavay, a ləvey:  
«Ka da njeý ndaw ma ka kwakwas adəw nga

sərmataw  
anda Melkisedek.»

<sup>18</sup> Anda kefe, mewey masa zleezle na, mahaz-akadakaya sem maja ara cek nga tede, a jəney ndaw ba. <sup>19</sup> Kwakwas nga Mawiz na, ta gwa nga ləhdata ndəhay daa ba. Ama wure kefe, aləkwa ma pakwa lengeſl a ray cek mahura maaya masa aləkwa ma səkwakwa heyey la. Ara ta fa cek aha aləkwa ma da ngəchakwa ngada fa Gazlavay.

<sup>20-21</sup> Asaya, Gazlavay a pa Yesu nga ndaw ma ka kwakwas anga na, ta mbedey la maja. Ama ndəhay mekele ma təram nga ndəhay ma ka kwakwas zleezle na, Gazlavay ta mbedey maja daa ba. Ahaw, Gazlavay ta mbedey la maja Yesu, a ləvey:

«Yah, Bay Gazlavay akah, ya fa mbedey,  
kwa ya fa da mbədda mey adaw daa ba  
səlak:

“Ka da njeý ndaw ma ka kwakwas adaw nga  
sərmataw.”»

<sup>22</sup> Maja ngeſe, ya sərkwa fara fara, Yesu na, ara anga ma handərwa \*mejəwey-mey maaya ma fəna masa zleezle.

<sup>23</sup> Cek mekele daha saya, ndəhay ma ka kwakwas masa daa səkway nga Levi na, ata ga maja fa məcam, fa pam mekele, fa məcam, fa pam mekele. <sup>24</sup> Ama Yesu na, aa daha nga sərmataw, sləra anga nga mekey kwakwas na, fa da ndəvey daa ba. <sup>25</sup> Maja ngeſe, Yesu aa ta gədan mandaw mandaw nga ləhdata ndəhay masa ma ngəcham ngada fa Gazlavay ta fa anga. A gwa

---

**7:17** 7.17 5.6      **7:19** 7.19 9.9; Rm 3.20      **7:20-21** 7.21 7.17

**7:22** 7.22 8.6      **7:24** 7.24-25 6.20

a ka kōne maja aa ta dey nga sərmataw, anga fa dərar danğay mandaw mandaw a Gazlavay maja ata.

<sup>26</sup> Yesu na, ara \*ndaw mahura da ray ndəhay ma ka kwakwas nga Gazlavay masa ma gwa nga jəndakwar. Anğa na, aa maaya fa Gazlavay, manğəra fa vəda daa ba, mebərey da ray a kwa nekədey daa ba. Gazlavay a pa wal, aa da wuzlah ndəhay ta mebərey daa saba, a la a vad a cakay a. <sup>27</sup> Yesu na, anğa anda mahura hay da ray ndəhay ma ka kwakwas nga Gazlavay mekele hay ba. Ata na, fa vələm cek a Gazlavay mandaw mandaw, ngeeme, maja mebərey ata, fa dəba ha, maja mebərey nga ndəhay. Ama Yesu na, si a ka kōne na, daa ba. A vələr cek a Gazlavay dey pal gway na, mak, mekele daa ba. Cek aha na, ara anğa ma vəlda ray anğa nga məcey. <sup>28</sup> Kwakwas nga Mawiz a pey nga ndəhay ma ka kwakwas nga Gazlavay na, ndəhay magədan gway. Ndəhay a na, ara ndəhay ta mebərey. Ama daa masa Gazlavay ma mbedey na, \*membedey a, ta njeý sem aa slam a nga kwakwas nga Mawiz. Gazlavay a pey nga ndaw mahura da ray ndəhay ma ka kwakwas anğa na, Bəzey anğa. A pa na, nga sərmataw. Gazlavay ta tərda sem nga ndaw ma gwa nga kata cek hay tabiya maaya maaya.

## 8

---

**7:25** 7.25 2.11; 10.14; Rm 8.34; 1Jn 2.1      **7:26** 7.26 4.15      **7:27**  
 7.27 5.3, 9; 7.25; 9.12, 26, 28; 10.10, 12; Rm 6.10; 1Pi 3.18      **7:28**  
 7.28 5.1-2, 8; 7.19; Ps 2.7

*Mey da ray Yesu, ndaw mahura da ray ndəhay ma ka kwakwas nga Gazlavay*

<sup>1</sup> Fara fara ndaw aləkwa mahura da ray ndəhay ma ka kwakwas nga Gazlavay na, daha. Ara Yesu, aa manjakaya ta har-zəmay nga Bay Gazlavay da vad, fa wey da ray cek hay tabiya. Kede he ara \*bay-ray nga mey masa ala ma wudam nga ləvey. <sup>2</sup> Anğa na, a ka sləra anğa daa Way-mekərcey fara fara masa da vad, daa \*Slam masa Gazlavay aa da hwad a masa fara fara. Ara slam masa Gazlavay ma diya da vad, ba na, ara slam masa ndaw ma diya da hwayak ba.

<sup>3</sup> \*Ndaw mahura da ray ndəhay ma ka kwakwas nga Gazlavay wura wura na, sləra anğa ara nga vəley cek ta nga hərar gənaw a Gazlavay. Anda kede, Yesu na, si a vəlar cek a Gazlavay may. <sup>4</sup> Da haa wure kede anğa da bəla na, anja kwa fa da key \*ndaw ma ka kwakwas nga Gazlavay na, daa ba. Fa da key daa ba na, maja ndəhay ma vəlam cek a Gazlavay anda \*kwakwas nga Mawiz ma ləvey na, daha cay. <sup>5</sup> Ndəhay ma ka kwakwas a na, a kamara sləra ata daa way nga Gazlavay. Ama sləra masa ata ma kamara ha na, ara anda meezed e, ba na, ara anda da gazlavay da vad ba. Cek aha, ta key la kəne ta Mawiz may. Daa masa fa da kərca way ngada Gazlavay na, Gazlavay a ləvar: «Jəkey sləmay maaya maaya, kərca way a ta cəved e anda yah ma ləvka daa anğwa nga Sinay

---

**8:1** 8.1 4.14; har-zəmay: 1.3, 13; 7.25; 10.12; 12.2, 25; Ps 110.1; Mt 22.44; SNM 2.33; Rm 8.34; Ef 1.20; Kwa 3.1    **8:2** 8.2 8.5

heyey.» <sup>6</sup> Ama wure keɗe, slëra masa Yesu ma ka na, a fëna slëra masa ndëhay ma ka kwakwas a ma kamara. Asaya, Yesu a cëmtar ɗay nga ndëhay ta Gazlavay amba Gazlavay a jëwey mey mawiya ta ata. \*Mejëwey-mey Mawiya ha na, a fëna mejëwey-mey masa zleezle maja cek masa Gazlavay ma lëvey a da katara a ndëhay daa mejëwey-mey mawiya na, a fëna cek masa aa ma lëvey daa mejëwey-mey masa zleezle.

*Mey da ray mejëwey-mey mawiya*

<sup>7</sup> Da \*mejëwey-mey ngeeme ta gwa nga ka cek tabiya anda Gazlavay ma wuɗey la na, anja ngeene, Gazlavay fa da jëwey mey mekele daa saba. <sup>8</sup> Ama Gazlavay ta mbëɗtar ray sem a ndëhay annga hay maja meberëy ata. A lëvtar:

«Yah, Bay Gazlavay, ya lëvey: pas a, a wuswa la masa yah ma da jëwey mey mawiya ta ndëhay Israyel hay lenj ta ndëhay daa sëkway nga Juda.

<sup>9</sup> Mejëwey-mey a na, fa da key anda mejëwey-mey

masa yah ma ka ta papaŋ nga papa ata hay zleezle

daa masa yah ma badatërwa

daa hwayak nga Ejip heyey na, daa ba.

Ndëhay a ta sëpmara mejëwey-mey a ta cëved e daa ba.

Ara maja ngeene, yah ma mbëɗtar dëɓa.

<sup>10</sup> Yah, Bay Gazlavay, ya lëvey:

---

**8:5** 8.5 9.9; 10.1; Kwa 2.17; way mekercey: 9.2; Mab 25.9, 40

**8:6** 8.6 7.22; 8.2, 6, 13; 9.11, 15; 12.24; Iz 55.3; Jer 31.31-33; Ez 37.26; 1Kwr 11.25     **8:8** 8.8-12 Jer 31.31-34; Heb 10.16-17

- Mejøwey-mey masa yah ma da ka  
 ta ndøhay \*Israyel hay ηgada fa mey na,  
 ara mewuzey kwakwas adaw ηgada ata,  
 ahaw, ya wuzlalatara la aa mevel ata.  
 Ya da tørey Gazlavay ata,  
 ata may, a da tøram ndøhay adaw hay.
- 11 Kwa ndaw ma daa sørkada ndaw daa hwayak  
 aηga,  
 da daa ba, mølmaha,  
 a løvar: "Si ka søra Bay Gazlavay" na, daa ba,  
 maja ata tabiya, kwa bøza hay, kwa mahura  
 hay na,  
 a sørmaya la.
- 12 Yaw, ya mbøkdatara maηgøra ata la,  
 kwa ya fa da sørfada mebørey ata daa saba.»
- 13 Masa Gazlavay maa guzley da ray mejøwey-  
 mey mawiya na, ta tərda mejøwey-mey masa  
 ηgeeme sem ηga magurma. Cek wura wura  
 masa magurma na, gweegwe cay aa zødey.

## 9

### *Mey da ray mejøwey-mey masa ηgeeme*

- 1 Daa \*mejøwey-mey masa ηgeeme, \*mewey  
 hay daha. Mewey hay a fa wuzdatara cøved a  
 ndøhay ηga søpey Gazlavay. Asaya, slam daha  
 ηga dørey danηay masa ndøhay ma diymara.
- 2 Ta kørkam way la, way a na, mawunkakaya  
 ta zana slam cew. Slam masa ηgeeme na, a  
 zølmara \*Slam maaya ηga Gazlavay. Daa slam  
 aha na, petørla mahura ta neneη ηga awaw  
 hay maasala daha, asaya, taabal daha. Peη

mavøldakaya ngada Gazlavay mapakaya da ray a. <sup>3</sup> Slam ta da døba zana na, a zølmara \*Slam masa Gazlavay aa da hwađ a. <sup>4</sup> Daa slam aha na, slam-meewurey cek mezey maaya ngada Gazlavay daha, slam aha makakaya ta børe magaza. Asaya, \*akwatay nga hwadam daha, børe magaza makakaya fa vøđa. Daa akwatay a na, taasa makakaya ta børe magaza daha. Daa taasa ha na, cek mezømey mezøley «\*man» da hwađ a daha. Dangwar nga \*Aranw masa maa fekwey heyey aa daa akwatay a, asaya, beeler hay cew masa Gazlavay mawuzlala mewey anga hay fa vøđa heyey, ata daa akwatay a may. \*Akwatay a na, ara akwatay nga sørfedey mejøwey-mey nga Gazlavay ta ndøhay. <sup>5</sup> Da ray akwatay a na, cek hay cew daha ta zlara mavøđtakaya ta børe magaza. Cek hay a na, ata anda maslan hay nga Gazlavay, fa wuzdamørwa Gazlavay aa daa slam aha. Fa ciymata zlara ata hay a ray slam mewucey mambaz amba Gazlavay a mbøkdatara mebørey nga ndøhay. Ama wure keđe, ya gwa nga kada mey da ray cek hay masa daa slam aha cøpa ba.

<sup>6</sup> Yaw, cek hay daa way a na, mapatakaya anda keđe. Ndøhay ma ka kwakwas nga Gazlavay fa mbøzam mandaw mandaw aa slam masa ngøeme nga key sløra ngada Gazlavay. <sup>7</sup> Aa

---

**9:2** 9.2 way mekørcøy: 8.5; 9.11-12; Mab 26.1-30; petørla: Mab 25.31-39; taabal: Mab 25.23-30   **9:3** 9.3 Mab 26.31-33; Lev 16.2; Heb 6.19; 9.7, 12; 10.20   **9:4** 9.4 slam-meewurey cek: Mab 30.1-6; akwatay: Mab 25.10-16; man: Mab 16.32-35; dangwar nga Aranw: Mesl 17.21-25; beeler hay cew: Mab 25.16   **9:5** 9.5 Mab 25.18-22   **9:6** 9.6 10.11; Mesl 18.2-6

slam masa ta dɔba zana na, si ndaw mahura da ray ndohay ma ka kwakwas ma mbzey a hwaɗ a gway. A mbzey na, dey pal fa mevey. A mbzey na, si ta mambaz nga gɔnaw da har nga vley ngada Gazlavay amba Gazlavay a mbɔkɗara meberey \* anga, asaya, amba a mbɔkɗatara meberey nga ndohay mekele.

8 \*Mesafney nga Gazlavay a wufey nga lvey ta mey a keɗe na, slam masa ngeeme, da aa daha araj na, cɔved nga mbzey aa Slam masa Gazlavay aa da hwaɗ a ta dɔba zana a wurey ba araj. 9 Cek hay a cɔpa keɗe na, ara anda mey-menjey ma wuzwa cek hay masa ma kam wure keɗe. Anda melvey, cek masa ndaw ma vɔɗara a Gazlavay ta mehorey gɔnaw ngada Gazlavay na, a gwa nga tɔrɗa mevel nga ndaw aha maaya fa mey nga Gazlavay ba. 10 Cek hay a keɗe na, ara mewey hay da ray cek mezamey, da ray cek mesey, lej da ray mesopey kwakwas nga pɔrey cek amba a tɔram ndohay ma zlɔba kwakwas saba gway. Ara na, mewey hay nga ndohay magɔɗaj gway, fa da njeɗ ga daa ba. A da njeɗ nekɔfey haa ta pas masa Gazlavay ma mbɔɗɗata cek hay cɔpa mawiya.

*Mey da ray Kɔriste ma vɔɗa ray anga maja alɔkwa*

11 Wure keɗe \*Kɔriste ta sawa la. Anga na, \*ndaw mahura da ray ndohay ma ka kwakwas

---

\* **9:7** 9.7 meberey: Daa mewulkey nga Jɔwif hay na, Gazlavay a mbɔkey na, meberey masa ndaw ma ka tesufe ba. **9:7** 9.7 5.3; 9.25; 13.11; Lev 16.2-16 **9:9** 9.9 7.19; 9.2 **9:10** 9.10 Lev 11; 15; Mesl 19

nga Gazlavay ma handandakwara maaya anga masa aləkwa ma hətakwa wure kefe. A ka sləra anga na, daa way mahura ma fəna Way-mekərcey masa zleezle. Way a na, aa maaya kalah, ara ndaw-magədan ma ləma ba. Way a na, aa da bəla kefe ba. <sup>12</sup> Masa Kəriste ma mbəzey aa \*Slam masa Gazlavay aa da hwaɗ a heyey na, ta mbəzey ta mambaz nga kwakwaba daa ba, ta mbəzey ta mambaz nga bəz-sla daa ba. Ama a mbəzey na, ta mambaz anga, ray anga. A mbəzey na, dey pal gway nga sərmataw. Anda kefe, ta ləhdandakwar sem daa mebərey nga sərmataw. <sup>13</sup> Anda kwakwas aləkwa ma ləvey na, da ndaw ta zləba kwakwas la na, si a wucmar mambaz nga kwakwaba, da daa ba, nga gusan fa vaw. Da daa ba na, si a lam sla-bəlak, a ndəlmara, a kwiydamura bebədes e a ray ndaw aha. Anda kefe, ndaw ma zləba kwakwas a na, a tərey ndaw ma səpa kwakwas a maaya maaya dəba. <sup>14</sup> Da anda kefe na, mambaz nga Kəriste na, a fəna cek masa ata ma kamara ngene ba daw? Mambaz anga na, a fəna mambaz nga gənaw hay ba daw? Kəriste na, kwa ta key mebərey daa ba, ta vəlda ray anga la a Gazlavay ta gədan nga \*Mesəfney nga Gazlavay masa mendəvey ba nga sərmataw. Mambaz anga na, a pərndakwara mevel amba ya kakwa cek malamba nga handandakwar aa meməcey saba. Anda kefe, ya da kakwa sləra nga Gazlavay, ndaw masa anga daha ta dey nga

---

**9:11** 9.11 4.14    **9:12** 9.12 7.27; 10.4; Lev 16.14-16; mambaz nga Kəriste: 9.25; 12.24; 13.12, 20; Mt 26.28; Rm 3.25-26; 1Pi 1.2, 18-19; 1Jn 1.7    **9:13** 9.13 Mesl 19.1-10, 17

sərmataw.

<sup>15</sup> Maja ηgene, Kəriste na, ara ndaw ma cəmtar d̄ay ηga ndəhay ta Gazlavay amba Gazlavay a jəwey mey mawiya ta ndəhay a. Anda kedē, ndəhay masa Gazlavay ma zelta na, a hətam maaya an̄ga masa aa ma ləvtar a da vəldatara heyey la. Maaya an̄ga ha a da n̄jey da ray ata ηga sərmataw. A hətam la, maja Kəriste ta məcey la. Meməcey an̄ga ha, a ləhdata ndəhay daa mebərey masa ata ma kamara daa masa ata daa \*mejəwey-mey ηgeeme heyey.

<sup>16</sup> Yaw, ya sərkwā da ndaw a mbədey mey na, si ndaw aha a məcey la d̄agay amba mey aha, a key. <sup>17</sup> Da ndaw aa ta dey na, membədey-mey an̄ga ha a key ba aran, si ndaw aha ma məcey la amba membədey-mey an̄ga a key. <sup>18</sup> Ara maja ηgene, kwa mejəwey-mey masa ηgeeme a zley na, ta mambaz. <sup>19</sup> Ta pas masa Gazlavay ma jəwa mey ta ndəhay \*Israyel hay na, teesed na, \*Mawiz a wuzdatara \*mewey masa Gazlavay ma vəldatara a ndəhay d̄agay. Fa dəba ha, a ley mambaz ηga bəz-sla ta ηga kwakwaba, a jahad̄a ta yam. Asaya, a ley mey-har ηga wudez, a ley ηngwec ηga təban̄ mandəvkaya magaza. A pada ηngwec e fa mey-har ηga wudez heyey, a jəhw̄ba aa mambaz a. A wuca fa d̄erewel masa mewey ηga Gazlavay mawuzlalakaya fa vəda, asaya, a wuctara fa ndəhay tabiya. <sup>20</sup> Aa guzley, a ləvey: «Gazlavay a jəwey mey ta akwar na, ta fa mambaz a kedē. A ləvkwar ηga namar

---

**9:14** 9.14 Rm 6.20-23; 8.2    **9:15** 9.15 8.6    **9:19** 9.19-20 Mab 24.6-8; Heb 9.12-13; mey-har ηga wudez: Lev 14.4, 6; Mesl 19.6

ray a mewey hay daa mejøwey-mey a.» <sup>21</sup> Asaya, Mawiz a wucey mambaz heyey fa Way-mekørcey lej fa cek hay tabiya mekey sløra daa way a may. <sup>22</sup> Anda kwakwas nga Mawiz ma løvey na, har-gødan nga cek hay a tøram maaya na, ta fa mambaz. Si mambaz a mbødwa la d'agay amba Gazlavay a mbøkdatarata mebörey nga ndøhay.

*Mey da ray Køriste ma vølda ray anga maja mebörey nga ndøhay*

<sup>23</sup> Ya taa guzlkwar la, ya løvkwar cek masa \*Mawiz maa sørkadatarata a ndøhay nga key na, anda meezed nga cek hay masa fara fara da vad' gway, ba na, ara cek hay a fara fara ba. Cek masa Mawiz maa sørkadatarata a ndøhay nga key na, aa fa tørdatarata cek hay cøpa maaya ta fa mebörey gønaw hay ngada Gazlavay. Ama ngada cek hay da gazlavay da vad' na, mebörey gønaw hay ngada Gazlavay na, ara cek nga tede. Si mekey cek mekele ma føna. Cek aha na, ara Yesu \*Køriste ma vølda ray anga nga kødøey vagay.

<sup>24</sup> Køriste na, ta mbøzey aa \*Slam masa Gazlavay aa da hwad' a daa Way-mekørcey masa ndøhay magødan ma kørøcamara ta har ata na, daa ba. Slam aha ngene na, ara anda meezed e, ba na, ara Slam nga Gazlavay fara fara ba. Ama Køriste a mbøzey na, aa slam da gazlavay da vad', Slam masa Gazlavay aa da hwad' a fara fara. Wure kedøe, aa daa slam aha fa dørar dangay a Gazlavay maja aløkwa.

<sup>25</sup> Asaya, \*ndaw mahura da ray ndøhay ma ka kwakwas nga Gazlavay na, fa mbøzey fa mevey

a fa mevey a aa Slam masa Gazlavay aa da hwaɗ a daa Way-mekərcey. A mbəzey na, ta mambaz nga gənaw da har. Ama Kəriste na, ta daw dey weewe aa Slam masa Gazlavay aa da hwaɗ a da vad nga vɔlda ray anga nga məcey maja aləkwa na, daa ba. <sup>26</sup> Da ta vɔlda ray anga la dey weewe na, anja ngene, ta sərəy banay la may dey weewe dɔga nga mezley nga bɔla. Ama ta wuzdərwa vaw anga la dey pal daa masa bɔla fa da ndəvey keɗe. Ta vɔlda ray anga la nga məcey amba a la mebərey nga ndəhay.

<sup>27</sup> Ndaw-magədan na, a da məcey dey pal gway, fa dɔba ha, Gazlavay a kar sariya.

<sup>28</sup> Kəriste may, ta vɔlda ray anga la dey pal nga məcey kəne amba a la mebərey nga ndəhay ga da bɔla. A da wuzwa vaw nga dey cew na, maja mebərey nga ndəhay saba, ama nga ləhdata ndəhay masa fa səkwmarə.

## 10

<sup>1</sup> Cek hay masa maaya ma da kam ngada fa mey na, kwakwas nga Mawiz na, fa wuzdandakwara maaya maaya daa ba. Ama a wuzndakwar na, cek anda meezeɗ e gway. Ndəhay ma səpmara Gazlavay ta fa kwakwas a na, kwa fa da tɔram maaya fa mey nga Gazlavay maja na, daa ba sələk. Kwakwas a, a wuɗey na, ndəhay a hɔram gənaw hay ngada Gazlavay fa mevey a, fa mevey a cənɔa. <sup>2</sup> Da mehərey gənaw a wusa nga tərdata ndəhay maaya fa mey nga Gazlavay nga səmataw na, anja ngene, ndəhay fa da

---

**9:26** 9.26 7.27      **9:28** 9.28 3.6; 10.10; Iz 53.11-12; Mt 26.28; 1Kwr 15.50-53      **10:1** 10.1 8.5

wulkam da ray mebørey ata daa saba, asaya, fa da høram gønaw mekele a Gazlavay daa saba.  
<sup>3</sup> Ama sasøkar jak, ta fa mehørey gønaw na, ndøhay fa wulkam da ray mebørey ata fa mevey a fa mevey a, <sup>4</sup> maja mambaz nga gusan ta nga kwakwaba na, a gwa a la mebørey da ray ndaw ba sælak.

<sup>5</sup> Maja ngene, daa masa Køriste ma da sawa a bøla na, taa guzlar la a Gazlavay, a løvar:  
 «Ka fa wufey amba ndaw a hørka gønaw,  
 a vølka cek na, daa ba,  
 ama ka ta vølya vaw nga ndaw-magødan la.

<sup>6</sup> Mehørey gønaw ma føkmarā da ray slam-meføkey cek,  
 ta mehørey gønaw ngada kah  
 amba ka mbøkda mebørey na, a mbafaka ba.  
 Ka wufey na, ndøhay a namaka ray.

<sup>7</sup> Anda keðe, ya ta løvka la: “Bay Gazlavay, ehe yah keðe,  
 ya sawa a bøla na, nga key sløra masa kah ma wufey  
 anda mawuzlalakaya da ray ađaw daa ðerewel akah.”»

<sup>8</sup> Køriste aa guzlar teesef ngada Gazlavay na, a løvey:

«Ka fa wufey amba ndaw a hørka gønaw,  
 a vølka cek na, daa ba.  
 Ka faa sømey da ray gønaw masa ma hørmara ma føkmarā da ray slam-meføkey cek na, daa ba.

Asaya, mehorey gənwaw nga mbəkey meborey  
 nga ndaw na,  
 a mbafaka ba may.»

Ta ŋgene he cəpa, kwakwas nga Mawiz a wufey  
 na, si ndəhay a vəlam cek a Gazlavay anda  
 ŋgene cəŋga. <sup>9</sup> Fa dəba ha, Kəriste a ləvey saya:  
 «Ehe, yah kedə, ya sawa a bəla na, nga key sləra  
 masa kah ma wufey.» Kəriste aa guzley anda  
 ŋgene na, a wufey nga ləvey ta vavəsa mekey  
 kwakwas ta gənwaw anda masa zleezle sem. Ta', a  
 bawa kwakwas mekele mawiya. <sup>10</sup> Yesu Kəriste  
 na, ta kar sləra la a Gazlavay anda Gazlavay a ma  
 wufey. Ta vəlda ray anga la dey pal nga məcey  
 maja aləkwa. Anda kedə, ta tərdandakwar sem  
 nga ndəhay manjar meborey fa mey anga.

<sup>11</sup> Ndəhay ma ka kwakwas nga Gazlavay na, a  
 kamara sləra ata mandaw mandaw ta melecey.  
 Ata fa hərəm gənwaw hay nga key kwakwas letək  
 mandaw mandaw a Gazlavay. Ama mehorey  
 gənwaw ata ŋgene, a la meborey da ray ndaw  
 ba sələk. <sup>12</sup> Ama Kəriste na, ta vəlda ray  
 anga la nga məcey dey pal amba a mbəkdatara  
 meborey nga ndəhay nga sərmataw. Fa dəba  
 ha, ta', a daw a njeý a har-zəmay nga Gazlavay.

<sup>13</sup> Fetede, aa manjakaya fa səkwa pas masa Ga-  
 zlavay ma da pata masa-gəra anga hay asi salay  
 anga. <sup>14</sup> Ta tərdata ndəhay sem maaya fa mey  
 nga Gazlavay manjar meborey nga sərmataw,  
 maja aa ma vəlda ray anga nga məcey. A vəlda  
 ray anga ha na, dey pal gway.

15 \*Mesəfney nga Gazlavay may, ta wuzdan-dakwara cek aha la maaya maaya. Teesed na, aa guzley, a ləvey:

16 «Bay Mahura a ləvey:

“Ya da jəwey mey ta ata daa dar hay a ngene.

\*Mejəwey-mey a na, ya da ka

amba kwakwas adaw a njeý aa mevel ata,

asaya, ya da wuzlala aa lengesl ata.”»

17 Fa dəba ha, aa guzley saya, a ləvey:

«Ya fa da wulkey da ray mebərey ata

leñ da ray sləra ata maaya ba ngene na, daa

saba.»

18 Maja ngene, da Gazlavay ta mbəkda mebərey nga ndaw sem na, mehərey gəhaw nga mbəkey mebərey na, daa saba.

*Mey da ray menğəchey fa Bay Gazlavay ta mevel maaya*

19 Məlma adaw hay, maja mambaz nga Yesu ma mbədwa na, ya gwakwa nga mbəzey la aa \*Slam masa Gazlavay aa da hwad a. 20 Ta

wurndakwar cəved mawiya la masa ma da handandakwar aa heter mendəvey ba ta fa zana menğərey daa \*Way nga Gazlavay heyey, anda meləvey, ta fa vaw nga \*Kəriste masa ma məcey fa hwadam mazlanğalakaya heyey. 21 Ndaw

aləkwa mahura da ray ndəhay ma ka kwakwas daa Way nga Gazlavay na, daha. Anğa na, \*bay-ray nga way a. 22 Anda kedə, si ya nğəchakwa fa Gazlavay ta mevel maaya, ta metəbey mey

---

**10:16** 10.16-17 Jer 31.33-34; Heb 8.10, 12    **10:19** 10.19 4.16; 9.8    **10:20** 10.20 zana: 9.3; Mt 27.51; cəved mawiya: 2.14-15; 9.14-15; Jan 14.6    **10:21** 10.21 3.6; 4.14

nga Gazlavay ta mevel pal, ta mevel manjar mebarey, asaya, vaw aləkwa may maperkaya ta yam masa maaya. <sup>23</sup> Gazlavay ta ləvey la, a da ləhdandakwar. Gazlavay na, a ka cek aha la anda aa ma ləvey. Anda keɗe, aləkwa fa ləvkwa fa mey nga ndəhay tabiya, aləkwa fa təbkwa aa mevel aləkwa cek masa Gazlavay ma ləvey a da ka heyey. Mbəkɗakwa mewulkey cew cew. <sup>24</sup> Aləkwa cəpa si ya jənkwa vaw da wuzlah aləkwa amba ya vəkwa gəɗaŋ da wuzlah aləkwa nga wuɗey vaw, asaya, nga key cek maaya. <sup>25</sup> Ya da mbəkɗakwa nga daw aa \*mecəmey-ray nga ndəhay nga Yesu anda ndəhay siya ma mbəkdamara na, kəne ba. Ama si ya vəkwa gəɗaŋ da wuzlah aləkwa ma fəna ma fəna, maja pas masa Bay Mahura ma da sawa na, anga gweegwe cay.

<sup>26</sup> Aləkwa taa sərɗakwa la da ray mey masa fara fara. Ama fa dəba ha, da ya kakwa mebarey tesuɗe na, kwa ya həkwar gənaŋ na, cek mekele nga vəley a Gazlavay nga mbəkey mebarey aləkwa daha daw? Daa ba səlɗak.

<sup>27</sup> Da kəne na, kwa cek mekele nga key daa ba, si mesəkwey sariya ta mandərzay daa dey, sariya masa Gazlavay ma da ka ngaa zəɗɗata masa-gəra anga hay aa awaw menjem-njem e.

<sup>28</sup> Kwa waawa ma rəsa \*kwakwas nga Mawiz masa ndəhay cew, da daa ba, ndəhay maakar ma kam sede da ray a la na, a da kəɗmara ndaw aha vagay, fa da sərfamar dey-ceceh daa

ba. <sup>29</sup> Da anda ñgene na, ka wulkam na, kwara? Ndaw ma røsa Bøzey ñga Gazlavay, ma pa mambaz ñga Yesu ñga cek ñga tede, mambaz ñga \*Mejøwey-mey Mawiya masa ma pøra mevel anga, asaya, ma cøða \*Mesøfney ñga Gazlavay ma wuzdandakwara maaya ñga Gazlavay na, Gazlavay a da kada ndaw a na, kwara? A da sørda banay ta ndaw aha ma føna ñgene saya. <sup>30</sup> Fara fara, ya sørkwa ndaw masa maa guzley, ma løvey: «Cek masa ata ma kamiwa maaya ba na, ya pøla la, ya da katar sariya.» Asaya, ndaw a, aa guzley, a løvey: «Bay Gazlavay a da katar sariya a ndøhay anga hay.»

<sup>31</sup> Da sariya ñga Gazlavay, ndaw masa anga daha ta dey ñga sørmataw, ta tøða ndaw la na, ndaw aha a zøley marava la.

<sup>32</sup> Sørfadamara menjey akwar zleezle daa masa akwar ma tømara ñga njey daa mewedey ñga Bay Gazlavay tølám. Fa døða ha nekødey, akwar ta søram banay la ga, ama akwar ta bømara banay a la. <sup>33</sup> Daa ñgene, ta cøðmata ndøhay siya da wuzlah akwar la fa mey ñga ndøhay ga, ta sørdamata banay la. Ndøhay siya da wuzlah akwar ta døkmatar mevel la a ndøhay ma cøðmata ha ñgene.

<sup>34</sup> Ahaw, akwar ta søram dey-ceceh la fa ndøhay masa ata ma køzlamata aa førsøne maja Yesu. Asaya, daa masa ndøhay fa vamaqwara cek akwar hay na, akwar ta mbøkdamatara la

---

**10:28** 10.28 Mew 19.15; 2Kwr 13.1    **10:29** 10.29 2.3; 5.8; 9.12; Mt 12.31    **10:30** 10.30 Mew 32.35, 36    **10:32** 10.32-34 6.10  
**10:33** 10.33 1Kwr 4.9

ta meesəmey ŋga təbmara, maja ka sərmara akwar ta cek hay maaya mekele ma fəna, ma da njeŋ ŋga sərmataw. <sup>35</sup> Maja ŋgene, pamara Gazlavay ŋga ndaw akwar fara fara cəŋga, ka da mbəkdamara ba. Da akwar fa kamara kəne na, Gazlavay a pəlkwara mawurbay akwar la ma fəna. <sup>36</sup> Maaya na, ka bəsmara banay cəŋga

amba ka kam anda Gazlavay ma wudəy, asaya, amba ka hətam cek masa Gazlavay ma ləvey a da vəldakwara heyey. <sup>37</sup> Yaa guzley anda keđe na, maja

«menjeŋ nekədey fedə, fara fara mendərey nekədey gway,

ndaw ma da sawa heyey na, a sawa la,

aa fa sawa, fa da zənwə vaw daa ba səlak.»

<sup>38</sup> Gazlavay aa guzley, a ləvey saya:

«Ndaw adaw maaya na, ara ndaw ma paya ŋga ndaw aŋga fara fara.

Anda keđe, a hətəy heter mendəvey ba la.

Ama da ndaw a vəhey fa dəba na,

ya fa daa səmey da ray a daa ba.»

<sup>39</sup> Aləkwa na, səkway ŋga ndəhay masa ma vəham sem fa dəba amba aa zədam na, kəne ba, ama aləkwa na, ndəhay ma pamara Gazlavay ŋga ndaw ata fara fara. Anda keđe, Gazlavay a ləhdandakwar la.

## 11

*Mepey Gazlavay ŋga ndaw fara fara na, a wudəy ŋga ləvey kwara?*

<sup>1</sup> Mepey Gazlavay nga ndaw fara fara na, a wudèy nga lèvey cek masa alèkwa ma sèkwakwa fa Gazlavay na, ya sèrkwa ya hètakwa la fara fara. Kwa alèkwa ta hètqwar ta dey alèkwa daa ba na, ya sèrkwa ara cek fara fara.

<sup>2</sup> Ara anda keðe, ndèhay masa zleezle ma pamara Gazlavay nga ndaw ata fara fara. Ara maja ngene, Gazlavay maa hèmdata. <sup>3</sup> Alèkwa fa pakwa Gazlavay nga ndaw alèkwa fara fara. Ara maja ngene, ya sèrkwa Gazlavay a lèma slam da vad ta slam da hwayak ta fa mey anga meeguzley gway. Anda melèvey, cek hay masa alèkwa ma hètatakwar ta dey alèkwa na, Gazlavay a katèrwa ta fa cek masa alèkwa ma hètatakwar ta dey alèkwa ba.

<sup>4</sup> Yaw, \*Abel ta pa Gazlavay la nga ndaw anga fara fara. Anda keðe, ta vèlar cek la a Gazlavay ta mevel pal ma fèna nga mèlmaha \*Kayin. Maja ngene, Gazlavay ta tèba cek masa anga ma vèldara heyey la, a pa nga ndaw maaya fa mey anga. Kwa Abel e ta mècey sem na, aa faa guzlndakwar anda aa ta dey cènga, maja aa ma pa Gazlavay nga ndaw anga fara fara.

<sup>5</sup> Henakw ta pa Gazlavay la nga ndaw anga fara fara. Da ray ngene, Gazlavay a la a vad a cakay a, kwa ta mècey ta mècey daa ba, kwa ndaw ma hètèr daa saba. Masa Gazlavay ta la Henakw a daa ba aran na, Henakw fa kar cek ma mbafar a Gazlavay, anda mawuzlalakaya daa dèrewel nga Gazlavay. <sup>6</sup> Da ndaw ta pa

Gazlavay nga ndaw annga fara fara daa ba na, ndaw aha fa da kar cek ma mbafar a Gazlavay daa ba. Kwa waawa ma wufey nga ngəchey ngada fa Gazlavay nga dorey dangay na, si a sərə Gazlavay na, daha, asaya, si a sərə Gazlavay fa katar maaya ngada ndəhay ma səpmara.

<sup>7</sup> Nəwe ta pa Gazlavay la nga ndaw annga fara fara. Maja ngene, ta pas masa Gazlavay ma wuzdara cek hay ma da kam ngada fa mey masa kwa ta hətatar ta dey annga daa ba aran na, Nəwe he ta jəkfar sləmay la a Gazlavay cəngə. Ta', aa cedey kwambiwal mahura anda way nga ləhda ray annga ta ndəhay da way annga hay. Nəwe ma pa Gazlavay nga ndaw annga fara fara ngene na, a wuzdərwa ndəhay siya da bəla fa pamara Gazlavay nga ndaw ata fara fara daa ba. Anda keđe, Gazlavay may, a pa Nəwe nga ndaw maaya fa mey annga.

<sup>8</sup> \*Abərahəam ta pa Gazlavay la nga ndaw annga fara fara. Maja ngene, daa masa Gazlavay a ma zəla heyey na, ta jəkfar sləmay la. Da ray ngene, ta', a daw aa hwayak masa Gazlavay ma ləvar a da vəldara heyey. Slam masa annga ma daw a hwađ a na, kwa ta sərə fede na, daa ba. <sup>9</sup> Abərahəam ta pa Gazlavay la nga ndaw annga fara fara, maja ngene ta', a daw a njeý daa hwayak masa Gazlavay ma ləvar a da vəldara heyey, ama annga manjakaya anda ndaw-məlak. Anda keđe, a njeý daa way-mekərceý. Ata \*Izak ta \*Jakwap may, Gazlavay a ləvey a da vəldatara hwayak a anda aa ma ləvey a da vəldara a

Abøraham. Ata may, a njam daa way-mekørcey anda Abøraham a. <sup>10</sup> Abøraham na, fa sækwa berney masa salay a mapakaya maaya maaya. Ara Gazlavay ta ray anga ma pa kwakway nga berney a, asaya, ara anga ma løma berney a.

<sup>11</sup> Yaw, Abøraham ta pa Gazlavay la nga ndaw anga fara fara. Da ray ngene, kwa anga maraw, asaya, kwa ngwas anga Sara aa dørlay na, ta key hwað la cønga. Abøraham a søra Gazlavay ma løvar a da vølar bæzey heyey na, a mbørzley ba. <sup>12</sup> Ara anda keðe, Abøraham, ndaw masa fa sækwey memøcey na, ta yawa bøza hay la, sækway anga ta key la ga anda wurzla hay da vad, a sløfam ba anda mawurbay da wayam.

<sup>13</sup> Ndøhay a keðe cøpa ta pamara Gazlavay la nga ndaw ata fara fara haa kasl fa memøcey ata. Ata ta høtam cek masa Gazlavay ma løvey a da vøldatara heyey na, daa ba. Ama a sørmara pas pal na, Gazlavay a vøldatara la anda aa ma løvey a. Da ray ngene, ata faa sømam da ray a, taa guzlam la, a løvam ata na, ata anda mølak hay da bøla keðe, fa da njam daa ba, kwa hwaray ta katar nga løvey køne na, daa ba. <sup>14</sup> Ndøhay a maa guzlam anda ngene na, a wuðey nga løvey ata fa søpam hwayak ngada ata ray ata. <sup>15</sup> Ta wulkam da ray hwayak masa ata ma mbøkdamørwa na, daa ba. Da ta wulkam la na, anja a vøham la aa hwayak a saya. <sup>16</sup> Fara fara a søpam na, hwayak masa maaya, anda

---

**11:9** 11.9 MC 35.12, 27    **11:10** 11.10 13.14    **11:11** 11.11 MC 17.19; 18.11-14; 21.2; Rm 4.19-20    **11:12** 11.12 MC 15.5    **11:13** 11.13 11.9; 13.14; MC 23.4; 47.9; Ps 39.13

meløvey slam da gazlavay da vad. Ara maja ηgene, Gazlavay ma løvey, anga Gazlavay ata, kwa hwaray fa da kar ηga løvey kōne na, daa ba. Nōka, Gazlavay ta dīytar berney maaya la, ba diya?

<sup>17-18</sup> Gazlavay aa guzlar a Abōraham, a løvar: «Ara ta fa bōza hay ηga bōz akah Izak, slōmay akah ma da zōley.» Fa dōba ha, Gazlavay a jada Abōraham a ηga vōldara bōzey anga mendulēη Izak ηga hōrey. Abōraham ta pa Gazlavay la ηga ndaw anga fara fara, maja ηgene, ta', a la bōzey a, a daw ηga hōrara ηgada Gazlavay.

<sup>19</sup> Abōraham a sōra Gazlavay na, a gwa ηga slōkfdadōrwa ndaw daa memōcey. Anda kedē, a hōtar bōzey anga Izak na, ara anda a slōkfdawa daa memōcey.

<sup>20</sup> Izak ta pa Gazlavay la ηga ndaw anga fara fara, maja ηgene, ta', a pōstar mey ηgada ata Jakwap ta Ezayu da ray cek ma da kam ηgada fa mey. <sup>21</sup> Jakwap may, ta pa Gazlavay la ηga ndaw anga fara fara. Da ray ηgene, daa masa Jakwap a fa da mōcey na, ta pōstar mey la ηgada bōza hay ηga \*Jawzef, fa dōba ha, a dōra dangay fa zlanday anga, a hōlma Gazlavay.

<sup>22</sup> Jawzef ta pa Gazlavay la ηga ndaw anga fara fara. Maja ηgene, daa masa anga fa da mōcey na, taa guzltar la a ndōhay \*Israyel hay, a lōvtar, cay na, a bam la daa hwayak ηga \*Ejip. Asaya,

---

**11:16** 11.16 13.14; Mab 3.6; Mt 22.32    **11:17-18** 11.17-18 MC 21.12; 22.1-14; Jak 2.21    **11:19** 11.19 Rm 4.17    **11:20** 11.20 MC 27.27-29, 39-40    **11:21** 11.21 MC 47.31-48.20

taa guzltar la da ray cek masa ata ma da kam ta tetesl anğa.

<sup>23</sup> Ata papañ nga \*Mawiz ta mamaha ta pamara Gazlavay la nga ndaw ata fara fara. Anda kede, daa masa ata ma yamərwa Mawiz a na, ta badamara la ta bey kiya maakar da way. A nəkmarā bəzey a na, a mbey ara mey ba. Ata na, kwa ta zluram ta mey nga bay Ejip daa ba.

<sup>24</sup> Masa Mawiz a ta gəley cay na, a wuđey a zəlmara bəzey nga dam nga bay \*Farawan, bay Ejip ba. A wuđey nga zəley kəne ba na, maja anğa fa pa Gazlavay nga ndaw anğa fara fara may. <sup>25</sup> A wuđey nga sərey banay ta ndəhay nga Gazlavay da ray aa ma da njeý nekəđey daa meesəmey daa mekey mebərey. <sup>26</sup> A wuđey na, ndəhay a rəsmara maja \*Kəriste, da ray anğa ma da hətəy zleley ga da Ejip ngene. A wuđey kəne na, maja anğa fa səkwa mawurbay nga sləra anğa masa Gazlavay ma da vəldara ngada fa mey.

<sup>27</sup> Mawiz ta pa Gazlavay la nga ndaw anğa fara fara, maja ngene, ta bawa sem daa hwayak nga Ejip. Kwa mevel nga bay da Ejip e fa cey na, ta ngene he cəpa, Mawiz ta zlurey daa ba səlak. Anğa malacakaya deñ e anda ta hətəy Gazlavay la, Gazlavay masa kwa ndaw ta hətəy ta dey anğa daa ba səlak. <sup>28</sup> Mawiz ta pa Gazlavay la nga ndaw anğa fara fara, maja ngene, a zlar nga key gwagway mezəley «\*Pak». A ləvtar a ndəhay Israyel hay nga wucam mambaz nga gənaŵ fa

---

**11:22** 11.22 MC 50.24-25; Mab 13.19    **11:23** 11.23 Mab 1.22;  
2.2    **11:24** 11.24 Mab 2.10-12    **11:26** 11.26 12.2; 13.13    **11:27**  
11.27 Mab 2.15; 12.41

mey-slam ata hay amba maslanj nga Gazlavay masa ma kəđta ndəhay vagay a sawa a kəđta bəz ata hay maa-mey-ndaw saba.

<sup>29</sup> Israyel hay ta pamara Gazlavay la nga ndaw ata fara fara. Ara maja ngene, daa masa ata ma zləngdamara bəlay magaza na, bəlay a, a wunkey cew, daa cəvedf ata na, yam da hwadf a daa ba. Ama ndəhay Ejip hay ma səpmatar wurzay ma wudam nga zləngam may na, ta', yam a, a cəmey aa slam a, a babətata.

<sup>30</sup> Asaya, Israyel hay ta pamara Gazlavay la nga ndaw ata fara fara. Ara maja ngene, ata ma zlərmara mahwal nga berney nga Jerikwaw đar maasala, ta', mahwal a, a bəzley. <sup>31</sup> \*Rahap ngwas-barlaw daha, ta pa Gazlavay la nga ndaw anga fara fara may. Maja ngene, anga ma təbta ndəhay meslərey masa ma slərdamatərwa nga sengeley berney a. Ara maja ngene, Gazlavay ta kəđta vagay anda aa ma kəđta masa-gəra anga hay na, daa ba.

<sup>32</sup> Yaw, ya daa guzley da ray \*Zedeyanw, \*Barak, \*Samsanw, \*Jefte, \*Davit, \*Samiyel len ndəhay ma təla mey nga Gazlavay na, kwara sura? Ya fa da hətey har ngaa guzley da ray ata pal pal na, daa ba. <sup>33</sup> Ata may, ta pamara Gazlavay la nga ndaw ata fara fara, maja ngene, ta fənmata hwayak hay mekele mekele la ta gəđanj daa vəram. Ta kam cek la ta cəvedf e

---

**11:28** 11.28 Mab 12.1-14    **11:29** 11.29 Mab 14.21-29    **11:30** 11.30 Jes 6.12-21    **11:31** 11.31 Jes 2.11-12; 6.21-25; Mt 1.5; Jak 2.25    **11:32** 11.32 NMH 6.11-8.32; 4.6-5.31; 13.2-16.31; 11.1-12.7; 1Sam 16.1haa 1Bay 2.11; 1Sam 1.1-25.1

anda Gazlavay ma wufey. Ta hətam cek masa Gazlavay ma lövey a da völdatara heyey la. Ta gərcamatara mey nga mabar hay la maja a da pəwmata. <sup>34</sup> Ta məcmara awaw masa ma gədfey ta gədaŋ la. Ta ləham la daa masa fa da kədfmata ta dələw. Ata na, ta təram la nga masa-bəle hay, ama Gazlavay ta vəltar gədaŋ la. Ta jaram la daa vərəm, ta fənmata sewje hay ma samawa daa hwayak hay mekele mekele sem ta gədaŋ.

<sup>35</sup> Nğusay may, ta pamara Gazlavay la nga ndaw ata fara fara. Ara maja nğene, ata ma hətmatar ndəhay maməctakaya fa sləkdfamawa daa meməcey.

Yaw, ndəhay siya ta sərəm banay la ga ta mekədfey haa a məcam. Ama ta wudam nga ləhey daa banay a na, daa ba. A wudam nga məcey daa banay a amba Gazlavay a sləkdfadatərwa daa meməcey, a vəltar menjey masa ma fəna da bəla kefe. <sup>36</sup> Ndəhay mekele na, ta bəsmara mecədfey la, ta bəsmara laway la. Asaya, ta jəwmata la ta calalaw, ta gərcamata la aa fərsəne. Ama ta nğene he cəpa ta bəsmara la. <sup>37</sup> Siya hay da wuzlah ata na, taa zakamata la ta aŋgwa vagay, siya hay, ta dəslmata la cew cew. Siya hay, ta nğəmamata la ta dələw vagay. Ndəhay siya ta pəkam la saw kəne, ata masa-viya hay, a kəzlam fa vaw na, zana nga ambal nga dəkwa daa ba nga təbaŋ, ta sərəm banay la ga. <sup>38</sup> Ndəhay maaya nğene na, slam da bəla

---

**11:33** 11.33 NMH 14.6-7; 1Sam 17.34-36; Dan 6.1-27      **11:34**  
 11.34 Dan 3.23-25      **11:35** 11.35 1Bay 17.17-24; 2Bay 4.18-37  
**11:36** 11.36 Jer 20.2; 37.15      **11:37** 11.37 2Mev 24.21

keđe tøde nga njeý ngada ata ba. Fa pøkam saw da wuzlah-ley, da daa ba, da anɣwa, a nam daa bədam hay, da daa ba, daa vøged hay anda ndəhay masa ta bəlmata sem. <sup>39</sup> Ndəhay a keđe tabiya ta pamara Gazlavay la nga ndaw ata fara fara. Ara maja nɣene, Gazlavay ma pata nga ndəhay maaya fa mey anɣa. Ama ta hətam cek maaya masa Gazlavay ma ləvey a da vəldatara a ndəhay anɣa hay heyey na, daa ba. <sup>40</sup> Fara fara, Gazlavay ta bəy cek la maaya kalah ngada aləkwa, amba ta pas masa ta ndəvda sləra anɣa cay na, a vəldandakwara cek aha ngada aləkwa ta ata bama da mey pal.

## 12

<sup>1</sup> Ndəhay a tabiya ma pamara Gazlavay nga ndaw ata fara fara nɣene, fa zlərmandakwar ray nga vəlmandakwar gədaɲ. Ata fa wuzdaman-dakwara, ya da pakwa Gazlavay nga ndaw aləkwa fara fara na, ta fa banay masa ata ma bəsmara nɣene. Maja nɣene, hazakadakwa cek hay ma təkndakwar nga daw fa mey fa mey cəpa. Hazakakwa ma fəna na, mebərey ma təkndakwar nga daw fa mey fa mey daa mey nga Gazlavay. Jarakwa, nakwa fa mey fa mey haa kasl mendəvey a. <sup>2</sup> Nəkakwa dey na, si fa Yesu. Ya da mbəkdkwa ba, maja ara anɣa ma pandakwara cəved nga ləhey, asaya, ara anɣa ma da jəɲndakwar haa mendəvey a. Ta təba la nga kəɲmara fa hwadam mazlanɣalakaya, kwa hwaray ta kar nga məcey daa ba. A təba maja

a wulkey a da hōtey meesōmey masa Gazlavay ma badara nga veldara fa dōba ha. Wure keɗe, anga manjakaya ta har-zōmay nga Gazlavay ma wey da ray cek hay cōpa. <sup>3</sup> Ahaw, wulkam da ray Yesu a. Ndōhay malamba hay ta rōsmara la, ta sōrdamara banay la, ama ta bōsa la cōpa. Anda keɗe, ka da gōram ba, ka da mōcmara vaw ba.

*Mey da ray mekōtey nga Gazlavay*

<sup>4</sup> Akwar fa kōɗam vaw amba ka kam mebōrey ba, ama kwa ndaw pal da wuzlah akwar ta mōcey daa mekōɗey-vaw a daa ba aran.

<sup>5</sup> Akwar fa sōrfadamara mey masa Gazlavay ma dōkakwar mevel ta anga heyey, ba diya? Gazlavay aa guzlkwar anda aa maa guzltar ngada bōz anga hay, a lōvey:

«Bōz aɗaw, da yah, Bay Gazlavay,

ya fa sōrdaka banay nga kōtka na, tōba mekōtey a.

Da ya fa mbōɗka ray na, ka da cey mevel ba.

<sup>6</sup> Maja yah, Bay Gazlavay, ya kōtey na, ndaw masa yah ma wuɗa.

Ya sōrdey banay na,

ta ndōhay cōpa masa yah ma pata nga bōz aɗaw hay.»

<sup>7</sup> Gazlavay a sōrdakwar banay na, a key a kōtkwar. Anda keɗe, Gazlavay a pakwar na, anda bōz anga hay. Bōzey masa papaha a kōta ba na, daha daw? <sup>8</sup> Gazlavay na, fa kōtata bōz anga hay cōpa. Anda keɗe, da aa fa kōtkwar daa

ba na, ngene akwar bəz anga hay fara fara ba, akwar bəza hay manjar papaŋ.

<sup>9</sup> Yaw, papa aləkwa hay da bəla na, fa kətmandakwar, anda keɗe, aləkwa fa namatakwar ray. Kaa wara ya nakwar ray a papa aləkwa Bay Gazlavay ma fəna ba na, kwara? Da aləkwa fa nakwar ray na, ya da hət kwa heter mendəvey ba. <sup>10</sup> Papa aləkwa hay masa da bəla keɗe a kətmandakwar nga menjey nekəɗey gway anda mevel ata ma wuɗey. Ama papa aləkwa masa da vad na, a kətndakwar nga ɗiyndakwar amba ya tərkwā ndəhay anga hay maaya anda anga nga sərmataw. <sup>11</sup> Daa masa Gazlavay fa kətndakwar na, a mbafandakwar ba, a candakwar mevel. Ama, ndəhay ma təbmara mekətēy a na, a hətam menjey maaya la ta zazay fa dəba ha.

*Ndəhay nga Gazlavay a da njam na, kwara?*

<sup>12</sup> Anda keɗe, ka da məcmara vaw ba, kam gədaŋ nga daw fa mey fa mey. <sup>13</sup> Maaya na, ka səpmara cəved nga Gazlavay dər e amba ndəhay siya da wuzlah akwar masa-bəle hay a mbəkdamara mey nga Gazlavay ba, a səpmara Gazlavay maaya maaya.

<sup>14</sup> Səpam nga njeɗ ta zazay ta ndəhay tabiya, kam gədaŋ amba ka kam cek ma mbafar a Gazlavay, da daa ba na, kwa ndaw fa da hətər Gazlavay ta dey anga daa ba. <sup>15</sup> Wam vaw, kwa waawa da wuzlah akwar a da mbəɗar dəba a Gazlavay masa fa wuɗndakwar kalah keɗe ba.

---

**12:10** 12.10 Mt 5.48; Rm 5.2; Jak 3.17    **12:11** 12.11 12.14; Jak 3.17-18    **12:12** 12.12 Iz 35.3    **12:13** 12.13 MM 4.26    **12:14** 12.14 12.11; Mk 12.30-31; Ps 34.15; 1Kwr 7.15

Asaya, wam vaw amba kwa waawa da wuzlah akwar a terey anda slaslalay nga wudez masa meedewek e \* ba, da daa ba na, a da pey har, a da nosta ndohay siya ta dedewek anga ha.

<sup>16</sup> Wam vaw, kwa waawa da wuzlah akwar a da key cek malamba ba, a da resa cek maaya nga Gazlavay anda Ezayu ba. Ezayu a na, ta lovar la a melmaha mecøhe nga key mahura da ray a amba a vølar cek mezømey gway. <sup>17</sup> Ka sørmara fa døba ha, Ezayu ta wudey la amba papaha a pøsar mey cønga, haa a søpa mepøsey-mey a ta matøway daa dey. Ama papaha ta pøsar mey daa saba, maja Ezayu a gwa nga mbødda cek maaya ba masa anga ma ka heyey saba.

<sup>18</sup> Sørmara, daa masa \*Israyel hay ata da wuzlah-ley na, ata ta ngøcham la a cakay anywa nga Sinay, cek masa ndaw ma gwa nga gøsfar. Ama akwar na, ka ta ngøcham a cakay cek masa ndaw ma gwa nga gøsfar anda Israyel hay zleezle na, daa ba. Daa ray nga anywa ha na, awaw fa gødey njem! njem! da ray a, løvan bøk-bøk asaya, børgadan fa key ta gødan da ray a. <sup>19</sup> Asaya, daa anywa ha na, taalam fa cønwa, ðay fa cønwa. Israyel hay a ma cøndamara na, a tøwam, a wudam amba Gazlavay aa guzltar saba, <sup>20</sup> maja mey masa ata ma cøndamara na, a føntar gødan. Gazlavay aa guzltar, a løvtar:

---

\* **12:15** 12.15 slaslalay nga wudez masa meedewek e: Mey a kefe a patar lenjesl a ndohay da ray mesøpey kuley hay. (Nøka Mew 29.17.) Ndohay siya hay a wulkam mey a kefe a wudey nga løvey mepey mey aa mevel. **12:15** 12.15 Mew 29.17; Gal 1.6

**12:16** 12.16 MC 25.29-34 **12:17** 12.17 MC 27.30-40 **12:18** 12.18-19 Mab 19.16-22; 20.18-21

«Kwa ndaw, kwa cek nga ley ma gəsfar fa anɣwa ha na, hazakamara ta anɣwa haa a məcey.»

<sup>21</sup> Cek masa ata ma hətmar a na, ta zluradata sem kalah. Kwa \*Mawiz may, aa guzley, a ləvey: «Ya faa wesey maja mandərzay fa kaya.»

<sup>22</sup> Ama akwar na, ka ta nɣəcham la aa anɣwa nga \*Siyanw, aa berney nga Gazlavay, Gazlavay ndaw masa anɣa daha ta dey nga sərmataw. Berney a na, ara \*Jeruzelem masa da gazlavay da vad. Fetede maslan hay nga Gazlavay makustakaya ga, a sləfam ba, fa kam gwagway. <sup>23</sup> Asaya, akwar ta nɣəcham la a cakay bəza hay nga Gazlavay masa maa-mey-ndaw † makustakaya fetede may. Bəza hay a na, ara ndəhay masa Gazlavay ma wuzlalata mezəley ata sem aa derewel anɣa. Ata fa kam gwagway da vad may. Akwar ta nɣəcham la a cakay Gazlavay, Gazlavay masa ma katar sariya a ndəhay da bəla tabiya. Akwar ta nɣəcham la a cakay ndəhay masa ma kam sləra ta cəved e ma təram maaya kalah fa mey nga Gazlavay.

<sup>24</sup> Akwar ta nɣəcham la a cakay Yesu, ndaw masa ma mbəddərwa mambaz anɣa amba ya tərkwā ndəhay maaya fa mey nga Gazlavay. Yesu a na, ara ndaw ma handərwa \*Mejəwey-mey Mawiya masa Gazlavay ma jəwa ta aləkwa. Mambaz masa anɣa ma mbəddərwa na, a wuzwa cek

---

**12:20** 12.20 Mab 19.12-13      **12:22** 12.22 13.14; Gal 4.26; CWJ 5.11; 21.2      † **12:23** 12.23 bəza hay nga Gazlavay masa maa-mey-ndaw: Ara ndəhay tabiya ma təba mey nga Yesu manjatakaya da cakay Gazlavay.      **12:23** 12.23 Lk 10.20

maaya ma fəna cek masa mambaz nga \*Abel † ma wuzdərwa.

<sup>25</sup> Anda keđe, wam vaw, jəkfamar sləmay a ndaw masa maa guzlkwar, ka da mbəđmar dəba ba. Zleezle na, ndəhay ta jəkfamar sləmay a ndaw ma wuzdatara mey nga Gazlavay da bəla keđe daa ba. Ara maja ngene, Gazlavay ma sərdara banay ta ndəhay a. Aləkwa masa fa cəndakwa dəy nga Yesu, ndaw maa guzlnakwar ta da vad keđe, da ya jəkfakwar sləmay ba na, kaa ya da ləhkwa daa banay a kwara?

<sup>26</sup> Zleezle na, dəy nga Gazlavay ta cənwa la, hwiyak ta wusey la. Ama wure keđe, Gazlavay aa guzley da ray cek masa aa ma da ka, a ləvey: «Ya wusa hwiyak la dey pal saya. Ya da wusey na, hwiyak daada ba, ama slam da gazlavay da vad may.» <sup>27</sup> Mey masa ma ləvey «dey pal saya» a wuzwa cek hay tabiya masa Gazlavay ma katərwa na, a wusam la. Asaya, cek hay a, aa zədam la. A ka kəne amba cek hay masa ma wusam ba na, aa zədam ba, a njam kəne.

<sup>28</sup> Anda keđe, kakwar suse a Gazlavay maja aa ma vəlnakwar berney masa ma pəlhey ba, slam masa Gazlavay fa wey da ray ndəhay anga hay nga sərmataw. Kakwar cek masa ma mbafar, nakwar ray. <sup>29</sup> Sərmara, Gazlavay masa aləkwa

---

† **12:24** 12.24 Mambaz nga Yesu a fəna nga Abel na, kwara? Ndəhay siya a ləvam mambaz nga Yesu na, a wuzwa dey-ceceh ta mewudəy-vaw nga Gazlavay, ama mambaz nga Abel na, a wuzwa Abel ma wudəy nga kəđey ndəhay malamba hay. Ndəhay siya a ləvam mambaz nga Yesu a fəna mebərey ta gədaŋ.

**12:24** 12.24 8.6; 9.12; Abel: MC 4.10. **12:25** 12.25 6.4-6; 8.1; Mab 20.22 **12:26** 12.26 Mab 19.18; Hag 2.6, 21 **12:28** 12.28 13.14

ma həlmakwa na, anğa anda awaw maa wurey cek.

## 13

### *Mey da ray menjey maaya nga ndəhay nga Gazlavay*

<sup>1</sup> Akwar ndəhay nga Gazlavay, wudam vaw da wuzlah akwar cəngə anda akwar məlman hay.

<sup>2</sup> Anda keđe, sərfadamara nga təbey məlak hay a way akwar hay ta meesəmey. Ndəhay mekele ta təbam məlak hay la kəne, anja a təbam na, maslan hay nga Gazlavay, kwa ta sərmara daa ba. <sup>3</sup> Wulkam ta ndəhay daa fərsəne, anda akwar bama ta ata daa fərsəne he may. Asaya, wulkam ta ndəhay masa fa sərdamata banay, anda akwar may, fa səram banay bama ta ata.

<sup>4</sup> Kwa waawa nga jəkey sləmay fa mey masa Gazlavay ma ləvey da ray meley ngwas. Anda keđe, kwa waawa a da ley vaw saw da palah ba. Sərmara, Gazlavay a katar sariya la ngada ndəhay ma lam vaw saw da palah ta ngada ndəhay ma kam cek hay malamba.

<sup>5</sup> Kwa waawa a da wulkey kalah da ray dala ba. Sasəmam ta cek masa da har akwar gway, maja Gazlavay ta ray anğa taa guzley la, a ləvey: «Ya fa da mbədfka dəba daa ba. Kwa ya fa da mbəkdaka daa ba.» <sup>6</sup> Anda keđe, kwa waawa

---

**12:29** 12.29 Mew 4.24    **13:1** 13.1 6.10; 10.24; 13.16; 1Pi 1.22  
**13:2** 13.2 MC 18.1-8; 19.1-3; Jəw 31.32; Rm 12.13; 1Tm 3.2; 5.10;  
1Pi 4.9; 3Jn 8    **13:3** 13.3 10.34; Mt 25.36    **13:4** 13.4 1Kwr  
7.2-4; 1Tes 4.3-8    **13:5** 13.5 Mew 31.6, 8; Fəl 4.11-12; 1Tm 6.7-10

da wuzlah aləkwa a gwa nga ləvey ta mandərzay daa dey daa ba:

«Bay Gazlavay na, ara ndaw ma jənya.

Maja ŋgene, ya fa da zluvey kwa ta meeme daa ba,

maja ndaw ma gwa nga kaya cek maaya ba na, daa ba.»

<sup>7</sup> Wulkam ta \*bay-ray akwar hay daa \*mecəmey-ray nga ndəhay nga Yesu masa ma wuzdamakwara mey nga Gazlavay zleezle. Yaw, wulkam da ray menjey ata, asaya, da ray meməcey ata. Pamara Gazlavay nga ndaw akwar fara fara anda ata.

<sup>8</sup> Yesu \*Kəriste na, a mbədey ba dəga zleezle haa wure kefe, anga daha nga sərmataw.

<sup>9</sup> Wam vaw maja ndəhay faa sərkadamata ndəhay ta meesərkey mekele mekele masa wal ta meesərkey masa fara fara nga Gazlavay. Ndəhay a ŋgene, a da zlangadadamakwar ta meesərkey ata da ray mesəpey kwakwas da ray cek mezəmey. Ama kwakwas da ray cek mezəmey a na, kwa ta jənta ndəhay masa ma səpmara kwakwas a na, daa ba səlak. Anga maaya amba ndəhay a hətam gədan daa cəved nga Gazlavay ta fa maaya nga Gazlavay, da ray mesəpey kwakwas da ray cek mezəmey.

<sup>10</sup> Aləkwa na, ta slam aləkwa mefəkey cek \* ŋgada Gazlavay, ama ndəhay ma ka kwakwas

---

**13:6** 13.6 Ps 118.6    **13:7** 13.7 6.12; 1Kwr 4.16    **13:9** 13.9 Rm 14.2; Kwa 2.20-22; 1Tm 4.3    \* **13:10** 13.10 slam aləkwa mefəkey cek: Fefe a wufey ngaa guzley da ray Slam masa Gazlavay aa da hwaf a da vaf. Ara slam masa Kəriste ma mbəzey a hwaf a.

nga Gazlavay ata ta coved' nga zomey cek da ray slam aha daa ba. <sup>11</sup> Ata na, a heram gonaw. \*Ndaw mahura da ray ndohay ma ka kwakwas nga Gazlavay na, a mbzey ta mambaz a aa \*Slam masa Gazlavay aa da hwad a nga veldara a Gazlavay nga mbkey meberey nga ndohay. Aslaw a na, a badamara ta cakay, aa wurmara fetefe. <sup>12</sup> Yesu na, kone may, a da kedmara na, ta', a badamara la daa berney nga \*Jeruzelem ta cakay. A serey banay anda ngene na, amba a tordata ndohay nga ndohay maaya manjar meberey ta fa mambaz anga.

<sup>13</sup> Da anda kefe na, ya da sepkwa kwakwas nga \*Jewif hay saba. Bakwa la ta cakay, nakwa fa Yesu amba a pamandakwar hwaray bama ta anga. <sup>14</sup> Da bela kefe na, alakwa manjatakaya daa berney masa ma da njeý nga sermataw ba, ama ya sepkwa ta sepey na, berney masa Gazlavay ma da loma ngada fa mey. <sup>15</sup> Anda kefe, kakwa suse a Gazlavay mandaw mandaw ta mezoley nga Yesu. Mekey suse a ngene na, ara anda cek mevoley ngada Gazlavay ma bawa da mey alakwa nga helma. <sup>16</sup> Maaya na, ka kam cek masa maaya da wuzlah akwar, asaya, ka jonam vaw. Mekey cek anda ngene na, ara anda mevoley cek masa ma mbafar a Gazlavay.

<sup>17</sup> Maaya na, ka namatar ray a bay-ray akwar hay, ka conmatar mey. Ara ata ma nekfamakwar dey daa menjeý akwar, maja Gazlavay a daa

---

**13:11** 13.11 9.7; Lev 16.27      **13:12** 13.12-13 11.26; Mt 27.31-33

**13:14** 13.14 11.9-10, 13, 16; 12.22, 28; Fel 3.20; 2Kwr 5.6; 1Pi 2.11; CWJ 21.2      **13:15** 13.15 Ef 5.19-20; Ps 50.14, 23      **13:16** 13.16 Gal 6.10; Fel 4.18

cəfdəta da ray sləra ata masa ata ma kamara  
 ŋgada akwar. Anda keđe, da akwar fa namatar  
 ray na, a kamara sləra ata la ta meesəmey, da  
 daa ba na, har a da rəwtar. Da har ta rəwtar  
 sem na, ŋgene, fa da jənkwar daa ba sələk.

<sup>18</sup> Ambahw, dərəm daŋgay a Gazlavay maja  
 ala. Ya sərmara fara fara, mevel ala maaya,  
 ya wudam ŋga key cek ta cəved e mandaw  
 mandaw. <sup>19</sup> Yaa cəfdəkwar kalah na, ŋga  
 dərəy daŋgay a Gazlavay amba a vəlya cəved  
 ŋga vəhey fa akwar wure keđe.

### *Mepəsey-mey*

<sup>20</sup> Ara Gazlavay ma vəldəkwar zazay. Ara  
 aŋga ma sləkəfadərwa Bay aləkwa mahura Yesu  
 da wuzlah ndəhay maməctakaya. Yesu a na,  
 ta tərey la anda mecəkwer aləkwa mahura ma  
 nəkfandəkwar dey, maja aŋga ma məcey maja  
 aləkwa. Ta fa mambaz aŋga ma mbədwa  
 na, Gazlavay ta jəwey mey la ta aləkwa ŋga  
 sərmataw. <sup>21</sup> Anja Gazlavay ŋga vəlkwar  
 gədaŋ amba ka kam cek tabiya maaya anda aa  
 ma wudəy. Anja ŋga ka sləra aŋga ta aləkwa  
 ta gədaŋ ŋga Yesu \*Kəriste, amba ya təkwa  
 ndəhay maaya fa mey aŋga. Anja ndəhay ŋga  
 həlmamara ŋga sərmataw. \*Amen.

### *Mey ŋga madagway-dakw*

<sup>22</sup> Məlma adaw hay, ya fa kakwar ambahw,  
 təbmara mey adaw masa ma da vəlkwar gədaŋ

---

**13:17** 13.17 Ez 3.17; SNM 20.28-31; 1Kwr 16.16 **13:18** 13.18  
 10.22; Rm 15.30; 2Kwr 1.12; SNM 24.16 **13:20** 13.20 zazay:  
 12.14; Rm 5.1; 2Kwr 13.11; mejəwey-mey: 8.6; mambaz: 9.12  
**13:21** 13.21 Ef 2.10; Fəl 2.12-13

daa leeter keɗe ta meesamey. Leeter keɗe na, aa zazam daa ba. <sup>23</sup> Yaw, ya wudey nga wuzdakwara, mɛlma alɛkwa Timawte na, ta bawa cay daa fɛrsone. Da ta wuswa la fiyaw feɗe na, ya da diyam cew e fa akwar. <sup>24</sup> Camatar har a \*bay-ray akwar hay ta a ndohay nga Yesu fetede tabiya may. Mɛlma alɛkwa hay daa \*mecamey-ray nga ndohay nga Yesu daa hwayak nga Itali a camakwar har may. <sup>25</sup> Anja Gazlavay nga pɛskwar mey, akwar tabiya ndav.

**Mejəwey-mey Mawiya**  
**Mofu-Gudur: Mejəwey-mey Mawiya New Testament**  
**Le Nouveau Testament en langue Mofu-Gudur**  
**(Cameroun)**

copyright © 2007 Wycliffe Bible Translators, Inc.

Language: (Mofu-Gudur)

Contributor: Aramaic Bible Translation, Inc.

All rights reserved.

2020-11-19

---

PDF generated using Haiola and XeLaTeX on 21 Feb 2024 from source  
files dated 29 Jan 2022

2b021919-36cf-59da-a35f-10c5e5548811